

This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<https://books.google.com>





Über dieses Buch

Dies ist ein digitales Exemplar eines Buches, das seit Generationen in den Regalen der Bibliotheken aufbewahrt wurde, bevor es von Google im Rahmen eines Projekts, mit dem die Bücher dieser Welt online verfügbar gemacht werden sollen, sorgfältig gescannt wurde.

Das Buch hat das Urheberrecht überdauert und kann nun öffentlich zugänglich gemacht werden. Ein öffentlich zugängliches Buch ist ein Buch, das niemals Urheberrechten unterlag oder bei dem die Schutzfrist des Urheberrechts abgelaufen ist. Ob ein Buch öffentlich zugänglich ist, kann von Land zu Land unterschiedlich sein. Öffentlich zugängliche Bücher sind unser Tor zur Vergangenheit und stellen ein geschichtliches, kulturelles und wissenschaftliches Vermögen dar, das häufig nur schwierig zu entdecken ist.

Gebrauchsspuren, Anmerkungen und andere Randbemerkungen, die im Originalband enthalten sind, finden sich auch in dieser Datei – eine Erinnerung an die lange Reise, die das Buch vom Verleger zu einer Bibliothek und weiter zu Ihnen hinter sich gebracht hat.

Nutzungsrichtlinien

Google ist stolz, mit Bibliotheken in partnerschaftlicher Zusammenarbeit öffentlich zugängliches Material zu digitalisieren und einer breiten Masse zugänglich zu machen. Öffentlich zugängliche Bücher gehören der Öffentlichkeit, und wir sind nur ihre Hüter. Nichtsdestotrotz ist diese Arbeit kostspielig. Um diese Ressource weiterhin zur Verfügung stellen zu können, haben wir Schritte unternommen, um den Missbrauch durch kommerzielle Parteien zu verhindern. Dazu gehören technische Einschränkungen für automatisierte Abfragen.

Wir bitten Sie um Einhaltung folgender Richtlinien:

- + *Nutzung der Dateien zu nichtkommerziellen Zwecken* Wir haben Google Buchsuche für Endanwender konzipiert und möchten, dass Sie diese Dateien nur für persönliche, nichtkommerzielle Zwecke verwenden.
- + *Keine automatisierten Abfragen* Senden Sie keine automatisierten Abfragen irgendwelcher Art an das Google-System. Wenn Sie Recherchen über maschinelle Übersetzung, optische Zeichenerkennung oder andere Bereiche durchführen, in denen der Zugang zu Text in großen Mengen nützlich ist, wenden Sie sich bitte an uns. Wir fördern die Nutzung des öffentlich zugänglichen Materials für diese Zwecke und können Ihnen unter Umständen helfen.
- + *Beibehaltung von Google-Markenelementen* Das "Wasserzeichen" von Google, das Sie in jeder Datei finden, ist wichtig zur Information über dieses Projekt und hilft den Anwendern weiteres Material über Google Buchsuche zu finden. Bitte entfernen Sie das Wasserzeichen nicht.
- + *Bewegen Sie sich innerhalb der Legalität* Unabhängig von Ihrem Verwendungszweck müssen Sie sich Ihrer Verantwortung bewusst sein, sicherzustellen, dass Ihre Nutzung legal ist. Gehen Sie nicht davon aus, dass ein Buch, das nach unserem Dafürhalten für Nutzer in den USA öffentlich zugänglich ist, auch für Nutzer in anderen Ländern öffentlich zugänglich ist. Ob ein Buch noch dem Urheberrecht unterliegt, ist von Land zu Land verschieden. Wir können keine Beratung leisten, ob eine bestimmte Nutzung eines bestimmten Buches gesetzlich zulässig ist. Gehen Sie nicht davon aus, dass das Erscheinen eines Buchs in Google Buchsuche bedeutet, dass es in jeder Form und überall auf der Welt verwendet werden kann. Eine Urheberrechtsverletzung kann schwerwiegende Folgen haben.


Über Google Buchsuche

Das Ziel von Google besteht darin, die weltweiten Informationen zu organisieren und allgemein nutzbar und zugänglich zu machen. Google Buchsuche hilft Lesern dabei, die Bücher dieser Welt zu entdecken, und unterstützt Autoren und Verleger dabei, neue Zielgruppen zu erreichen. Den gesamten Buchtext können Sie im Internet unter <http://books.google.com> durchsuchen.

PF
5601
NG6
v.3



PF
5601
N66
v. 3



FLOS UNDE BLANKFLOS.

Von

Cornell University Library
PF 5601.N66 v.3
v.3

Flos unde Blankflos.



3 1924 027 511 520

018

Stephan Waetzoldt.

(Als anhang: De vorlorne Sone [Robert der Teufel] und De Segheler.)

~~~~~  
Heft I.  
Text.  
~~~~~

BREMEN, 1880.

Verlag von J. Kührtmann's Buchhandlung.

U. L. Fr. Kirchhof 4.

Niederdeutsche
D E N K M Ä L E R.

Herausgegeben

vom

Verein für niederdeutsche Sprachforschung.

Band III.

BREMEN, 1880.

Verlag von J. Kührtmann's Buchhandlung.

U. L. Fr. Kirchhof 4.

FLOS UNDE BLANKFLOS.

Von

Stephan Waetzoldt.

[Florio.]

anhang: De vorlorne Sone [Robert der Teufel] und De Segheler.)

BREMEN, 1880.

Verlag von J. Kührtmann's Buchhandlung.

U. L. Fr. Kirchhof 4.

A. 65637

~~~~~  
Druck von Diedr. Soltau in Norden.  
~~~~~

Vorbemerkung.

Um den weiteren druck des ind. Denkmäler nicht noch länger zu zögern, bin ich zu meinem bedauern in die notwendigkeit versetzt, recensierten text von Flos unde Blankflos, sowie die hier zum en male herausgegebene dichtung De vorlorne Sone (Robert der ofel) und das fragment De Segheler, zunächst ohne einleitung und bischen apparat der öffentlichkeit zu übergeben. — Die schuld der zögerung, mit welcher dieser band der Denkmäler erscheint, liegt leich an mir. Seit mehr als einem jahre haben die weitgehenden derungen, die eine neue amtstätigkeit an mich stellte, meine arbeitsft in solchem masse in anspruch genommen, dass die stetige fortrung und der abschluss der vom nd. Verein mir übertragenen arbeit r physisch unmöglich wurde. — Ein zweites heft, das, wie ich hoffen f, binnen jahresfrist fertigzustellen sein wird, soll eine auf herkunft d geschichte des mürchens und seine dichterischen gestaltungen sich htende einleitung zu Flos unde Blankflos und zum Vorlorne Sone, die den nicht unbeträchtlichen kritischen apparat zu Flos unde Blankss enthalten. Hier sei nur noch bemerkt, dass der textrecension von os unde Blankflos drei hdss. zu grunde lagen:

1. Die Wolfenbütteler Hds. (W.) im besitze der Herzogl. bibliothek zu Wolfenbüttel (Cod. Helmstad. 1203.) — klein 4°. Papierhds. des 15. jhs. —
2. Die Stockholmer Hds. (S.) im besitze der Riks-Bibliothek zu Stockholm (Vitterhet Tysk, No. 29.) — klein 4°. Papierhds. des 15. jhs. —
3. Die Berliner Hds. (B.) im besitze der Königl. Bibliothek zu Berlin (Ms. Germ. No. 186, 8°). — Papierhds. des 15. jhs.

In erster linie bin ich bei herstellung des textes der Berliner hds. folgt. — De vorlorne Sone, sowie das ihm folgende fragment De Seeler sind der Stockholmer hds. entnommen.

HAMBURG, im März 1880.

S. W.

Flos unde Blankflos.

- Dat geschach to einer tît,
also uns dat eventure gît,
dat de konink van Hispanien mit sîr macht
samelde grote hereskraft
5 unde vôr to Averne in des koninges lant,
dar stichtede he rof unde brant.
Deme koninge van Averne duchte,
dat he sik nicht weren mochte;
mit so groten sorgen
10 vestede he sine borgen
unde ôk alle sine stede,
dar was he sulven mede.
Mit stride dede he manlike were
jegen dat hispansche here.
15 De konink konde dar nicht winnen,
des moste he wedder tein van hinnen;
he leit ein deil des heres kraft
liggen an einer depen graft,
dar de pelegrime mosten henne gân,
20 de leit he schinden unde slân.
Der pelegrime was ein grote schar,
de dar quemen, dat is wâr;
van Vrankrike was darmede eines greven wîf,
schone unde wal gestalt was ore lif,
25 do vengen se de vrouwen an,
dat gar ovel was gedân;
oren leven heren slogen se dôt,
des drôch de vrouwe ruwe grôt.
Mit vil loveliken eren
30 brachten se de vrouwen vor oren heren.
Do de konink de vrouwen ansach,
dogentliken he do sprach
to sines sulves knechten,
de ome de vrouwen brechten:
35 ‚Bringet se der vrouwen mîn,
se sal ore willekomen sîn
unde sal se vil gerne hân.‘
Tohant reit de konink van dan,
mit ome tôch mannich helt bekannt
40 to Hispanien in dat lant.

- Do brachten se de grevinnen
 orer vrouwen der koninginnen,
 de entfenk do minnichlike
 de eddelen grevinnen rike. —
- 45 Van Hispanien de koninginne
 mit orem eddelen ingesinne
 unde ôk de grevinne here
 mit anderen junkvrouwen mere
 seten tosamende in einer schare
- 50 up einer kemenaden klare;
 se neiden deme koninge eine vane,
 de koninginne sprach: ‚Vrouwe, weset der sorgen ane,
 mi dunket an deme herten mîn,
 dat gi in juwem lande sîn
- 55 ein harde wal geboren wif,
 vil wal gestalt is juwe lif.
 Do sprach de grevinne
 mit drovelikem sinne:
 ‚Ik en was de beste nicht,
- 60 idder de boseste, des weset bericht.
 De koninginne se over ansach,
 minnichliken dat se sprach:
 ‚Gi sint bleik an juwer varwe stalt,
 dat dôt ju de sorge mannichvalt.‘
- 65 ‚Koninginne, leve vrouwe mîn,
 ik ga mit eineme kindelîn,
 ik hebbe ôk minen hern verloren,
 dat was ein greve wal geboren.
 Do sprach de koninginne:
- 70 ‚Berichtet mi, leve grevinne,
 an welchem dage mach dat sîn,
 dat gi sullet hebben dat kindelîn?
 De grevinne to der koninginnen sprach:
 ‚Vorwâr ik ju dat sagen mach;
- 75 vor meien eine korte tit,
 so men in unseme lande gît:
 in deme heren paschedage
 wert mi ein kint, dat ik ju sage.
 Do sprach de koninginne:
- 80 ‚Bi alle minem sinne,
 in deme sulven paschedage
 wert mi ôk ein kint, dat ik ju sage.
 Do sprach de gude grevinne:
 ‚Dat geve de himmelsehe koninginne!
- 85 generet werde juwe lif,
 got behude mi ôk vil arme wif.
 Darna in korten tiden

- de vrouwen mosten arbeit liden;
 de koninginne eines sones genas,
 90 des de konink vrolik was,
 einer dochter nas de grevinne,
 des vrouwede sik dat ingesinne.
 De konink sprak mit grotem schalle
 to sinen mannen alle:
 95 „Nu helpet mi to dissen kinden
 rechte namen vinden
 na der blogenden tit,
 dar se inne geboren sît.
 Do spreken se to der sulven stunde
 100 altomalen út einem munde:
 „De junkhere de si Flos genant,
 de junkvrouwe Blankflos wal bekant;
 rechter namen kunne wi on nicht geven,
 ift de kindere sullen leven
 105 na der wunnichliken tit,
 dar se inne geboren sît.
 Also heiten de kindere in walschen dingen,
 dat wil ik ju in dudisch bringen:
 Flos bedudet eine blomen schone
 110 gelike einer golden krone,
 Blankflos bedudet eine blomen wit,
 de in allen dogeden sit;
 dat sint disser twier namen
 an walsch unde an dudisch tosamem. —
 115 Nu moge gi horen wunder
 an dissen kinderen bisunder:
 se weren so lik an deme gesichte,
 dat men se unterscheiden mochte mit nichte,
 welk Flos idder Blankflos were;
 120 ôk secht uns der lude mere,
 dat de konink to der sulven stunde
 Blankflosse ores lives vorgunde;
 dat se Flosse was gelik,
 des bedrovede sik de konink rik.
 125 Do de sulven kindere waren
 wal van oren seven jaren,
 do sette de konink here
 sinen sone to der lere;
 deme junkheren was Blankflos lêf, des sît bericht,
 130 he en konde des bokes leren nicht.
 He sprak: „Leve vader mîn,
 môt Blankeflos wal bi mi sîn,
 so wil ik vil gerne lesen
 unde in der scholen stede wesen,

- 135 se is mi nutte unde gût,
 vorwâr ik dat spreken mût;
 ik lere vele desten bat,
 here vader, wetet dat.
 Do dat kint de wort sprach,
- 140 sîn moder de koninginne it ansach:
 „Dat du Blankflosse bist so gût,
 des is vil drovich mi mîn mût,
 wente se van kristenluden is,
 ik love des unde bin des wis;
- 145 doch wil ik se di nicht leiden
 unde se nicht van di scheiden.
 Tosamende lerdene se dat bôk
 unde ôk andere wisheit nôch. —
 Do de sulven kindere waren
- 150 olt van oren twelf jaren,
 do hadden se sik so lêf,
 dat de konink, de heidensche dêf,
 der junkvrouwen sere vorgunde
 ores lives to aller stunde.
- 155 De konink sprach to der koninginnen:
 „Wi moten breken disser twier minnen,
 unde laten Blankflosse slân dôt,
 wi nemen anders grote nôd;
 beholdet Blankeflos dat lif,
- 160 Flos en nimt nein ander wif.
 Do sprach de koninginne:
 „Ik en weit nicht in welchem sinne,
 dat unse kint solde bliven,
 late wi Blankflosse entliven?
- 165 Wi senden se in ein ander lant,
 so wert sîn sin van or gewant.
 De konink wart des to rade,
 dat he darna vil drade
 Blankflosse sande in eine andere stat,
- 170 dit bôk secht uns vorwâr dat.
 De kindere worden do gescheiden,
 grôt jamer was an on beiden,
 nacht unde dach Flos drovich was;
 deme koninge entfarnede das,
- 175 dat sîn kint so ovele leit.
 Dar wart lenger nicht gebeit,
 Blankflosse he wedder halen leit,
 do was Flosse vil vroude bereit.
 Do de kindere tosamende quemen,
- 180 se sik beide umme nemen,
 se kussedene sik mêr wen dusent stunt

- de eine den anderen vor sinen munt.
 De konink sorgede umme das,
 de koninginne ôk bedrovet was;
 185 de konink sprach: ‚Vrouwe, ik wil di sagen,
 wert Blankeflos nicht dôt geslagen,
 so neme wi anders groten schaden,
 Flos wert van Blankeflosse vorraden;
 unde love des up de truwe mîn,
 190 wi beide ome nicht so lêf en sîn.‘
 De koninginne in dat ende
 sprach: ‚Dat were missewende,
 dat wi Blankflosse slogen dôt,
 wente wi se út groter nôt
 195 aldus verne hebben gebracht,
 dar wert anders up gedacht:
 Wi senden Flosse in eine andere stede
 unde dôn ome goldes vil darmede,
 so mach he denne schouwen
 200 andere schone junkvrouwen,
 unde Blankeflosse vorgeten,
 hir wert nein beter rat gemeten.‘
 Over sprach de koninginne:
 ‚Ik rade dat bi minem sinne,
 205 wi senden Blankflosse to Rome in de stat
 unde geven se umme riken schat,
 dat is uns vele beter dān,
 wen dat wi se leten dôt slān.‘
 Deme koninge duchten de rede gût,
 210 he dede na der vrouwen mût,
 he sprach: ‚Blankflosse de junkvrouwen fin
 bringet út den ogen mîn!‘
 De kindere worden gescheiden do,
 des wart orer beider herte unvro,
 215 se wênden beide nacht unde dach,
 nein man dat vullenspreken mach
 de ruwe, de se dreven beide,
 like grôt was ore leide.
 Do de konink dat vornam,
 220 dat dat Flosse so ovele bequam
 unde so rechte ovele leit,
 dar wart lenger nicht gebeit;
 de konink sprach: ‚Sone, du solt van dan,
 nim mit di twelf vrome man,
 225 mit den soltu vrolik sîn,
 dat sal wesen de wille mîn.‘
 Flos de reit van dan,
 des bedrovede sik vil mannich man.

- Do sprak de konink to sineme kôpmanne:
 230 'Blankeflosse vore van danne!
 Se vôrden se to Rome in de stat,
 unde geven se umme riken schat.
 De kôplude satten se to prise
 na kôpliker lude wise;
 235 se vôrden se to Rome hin
 unde geven se umme gût gewin:
 umme seven hundert mark goldes,
 vil vro worden se des soldes,
 darto van golde dre neppelîn,
 240 de nemen se vor de junkvrouwen fin;
 twe hundert sperwer unde valken vorwâr,
 de nemen se vor de junkvrouwen klâr,
 darto manniger hande sirheit,
 de gaf me one albereit,
 245 van pellen unde van siden wande.
 Dar voren se mede ût deme lande
 mit den drên neppen unde vedderspil,
 darto ander sirheit vil,
 dar Blankflos umme wart geven do,
 250 des wart de konink unde de koninginne vro. —
 Nu sage wi des nappes art,
 dar Blankflos umme geven wart:
 De nap was reine van golde runt
 unde was beter wan dusent punt,
 255 ôk was dar ein stein in gesat,
 de gaf grôt licht, nu merket dat;
 wan dat an dene avent begonde gân,
 so worden de lichte ût gedân,
 we deme koninge schenken solde
 260 neine tartisen he hebben wolde;
 also gût was de stein,
 dat nicht schoners wart gesein;
 de sulve stein was ôk so klâr,
 over alle de borch lughtede he twâr.
 265 Nu beginne wi to lesen,
 dar wi dat leten wesen;
 van deme kôpmanne heve ik dat an,
 do se de junkvrouwen gekoft hân:
 Nicht lenger wolden se wachten,
 270 orme hern se de junkvrouwen brachten,
 van Babilôn was he genant,
 ein weldich konink over alle lant,
 he entfenk se dogentlike
 de weldige konink rike.
 275 Wat halp deme riken koninge dat,

- dat he Blankeflosse bat
 unde seven werve leit upwegen mit golde?
 Blankflos siner doch nicht en wolde;
 se hadde Flosse lêf, des sît bericht,
 280 darumme wolde se des koninges nicht.
 De konink an sine wisheit quam,
 vil schire he dat wal vornam,
 dat se siner nicht hebben wolde.
 He bat, dat men se solde,
 285 Blankflosse de junkvrouwen fin,
 bringen up dene torne sîn.
 Darna in korter tît,
 also uns dat eventure gît,
 de konink leit up dene torne gân
 290 vif unde twintich junkvrouwen wal gedân,
 de weren eddel unde rike;
 te beden se alle gelike,
 dat se dene konink oren heren
 to manne neme unde to eren.
 295 Blankflos hadde mit Flosse so vele beseten,
 dat se siner nicht konde vorgeten,
 up dene konink achtete se kleine,
 se hadde Flosse lêf alleine;
 nacht unde dach se drovich was.
 300 Eine junkvrouwe merkede das,
 Clarissa was se genant,
 eines hertogen dochter wal bekant,
 Blankflos hadde se útirkoren,
 wente se was bederve unde wal geboren.
 305 Eines morgens vullen vro
 minnichliken sprach or Clarissa to:
 ‚Wultu mi dine sorge sagen,
 du en solt or nicht alleine dragen,
 dat rede ik di bi miner ere,
 310 dat ik di melde nummermere.‘
 Blankflos swêch unde suchtede sere;
 Clarissa sprach: ‚Junkvrouwe here,
 sage mi de sorge dîn,
 de sal halve wesen mîn;
 315 wultu der sorge nicht vorlân,
 deme dode kanstu nicht entgân.
 Dîn sorge sal mi wesen leit,
 dat rede ik di up minen eit.‘
 Blankflos sprach: ‚Got si dîn lôn,
 320 dat du so wal wult bi mi dôn,
 dat du mîn leit wult mit mi dragen;
 des wil ik di minen kummer sagen:

- Ik meine an mineme herten sere
 Flos, de is ein schone junkhere,
 325 des en kan ik nicht vorgeten,
 an mineme herten is he beseten;
 beide nacht unde dach
 Flosse ik nummer vorgeten mach.
 Sîn vader is ein konink genant
 330 to Hispanien over dat lant.
 An eineme paschedage, sage ik di,
 wi beide geborn sint, des truwe mi,
 Flos van einer koninginnen
 unde ik van einer grevinnen.
 335 Wi weren so lik an deme gesichte,
 dat men uns scheiden mochte mit nichte;
 sîn vader to der sulven stunde
 mi mines lives sere vorgunde;
 to Rome sande he mi in de stat
 340 unde leit mi geven umme riken schat.
 Blankflos to Clarissen sprach:
 „Also mi dit dink beschach,
 dat ik arme bin her gekomen
 mi to schaden unde nicht to vromen.“
 345 Clarissa sprach: „Leve junkvrouwe fîn,
 got do uns sine hulpe schîn,
 unde helpe uns armen beiden,
 dat wi vroliken van hinne scheiden.“
 De torne, dar se wern uppe gân,
 350 mit negen muren was ummedân;
 to der ersten porten
 dre eddele vorsten hôrten,
 de daraf belenet waren,
 de mosten de porten wal bewaren;
 355 dene torne se mit vuller macht
 bewarden beide dach unde nacht.
 Ok dre brodere weren dar,
 de nemen der lesten porten war;
 des tornes hodden se so sere
 360 up ore lif unde ore ere.
 Also sulle gi weten dat,
 wo disse torne was besat,
 dar Blankflos up gesettet ist,
 der helpe got an korter vrist!
 365 dat se kome to Flosse wedder,
 so licht alle ore sorge nedder. —
 Do Flos wedder to lande quam
 unde Blankeflosse nicht vornam,
 do vragede he vil sere,

- 370 wor Blankeflos gebleven were?
 Se spreken alle gelike
 beide arme unde rike,
 wo se de konink hadde bericht.
 Do wolde he aflaten nicht,
- 375 he vragede wor se bleven were
 unde begonde to trorende sere.
 Darmede gink he in drovigen sinnen
 to orer moder der grevinnen;
 he sprak: ‚Vrouwe, ik mane ju bi gode
- 380 unde bi alle sineme bode,
 dat gi mi willen sagen,
 na Blankeflosse wil ik vragen.‘
 Do sprak de grevinne
 mit drovelikem sinne:
- 385 ‚Ik en kan di nicht gesagen,
 wêr se levet idder si dôt geslagen
 darumme dat gi ore so lêf waren,
 moste Blankeflos van hinne varen;
 is dôt geslagen de dochter mîn,
- 390 Flos, dat is de schulde dîn.‘
 Do Flos disse rede vornam,
 harde unsachte ome dat bequam,
 do gink he al mit liste,
 dar he sinen vader wiste;
- 395 he sprak: ‚Leve vader mîn,
 wor is gebleven de junkvrouwe fîn?
 Ik en wil nicht lenger leven,
 mîn levent wil ik deme dode geven.‘
 Do he disse wort sprach,
- 400 do gink he dar ein messet lach
 unde sprak: ‚Blankeflos, vil leve mîn,
 dit messet heft gewesen dîn,
 dit klenode hestu mi gegeven,
 darmede wil ik mi nemen dat leven!‘
- 405 Also he sik sulven vormorden wolde,
 men dat it nicht wesen solde;
 de koninginne nam des enwâr,
 hasteliken lêp se dar,
 vil na was se to spade komen,
- 410 Flos hedde sik dat lîf genomen.
 Disse sulve kindesche man
 vil sere wenende began
 unde sprak: ‚Blankeflos, vil leve mîn,
 dat wi aldus gescheiden sîn,
- 415 darumme en kan ik nicht vroliken leven,
 aller vroude mût ik mi begeben,

- mochte ik di noch eines sein,
 so were mi vil wal geschein;
 dîn bedrôfnisse dût mi grote nôt,
 420 ik wolde, dat ik were dôt!
 an dissen sorgen mût ik bliven,
 jamer unde ruwe mût ik driven.
 De konink one do vragede,
 do he Blankflosse so sere klagede,
 425 he sprak: „Leve sone min,
 Blankflosse de junkvrouwen fin
 eine suke se benam,
 dar ore de dôt van bequam;
 wultu des neinen loven hân,
 430 so machstu sulven hinne gân
 unde up deme steine lesen,
 wore Blankflos si gebleven.“
 Flos bedrovede sik sere do
 unde wart der mere unvro. —
 435 De konink hadde vor der tît,
 also uns dat eventure gît,
 ein graf gemaken laten rike,
 nergen vant men sîn gelike.
 De stein, de up deme grave lach,
 440 nein man beter stein en sach,
 he was gesiret unde besat
 mit eddelen steinen, wete dat,
 ôk stunt up deme steine grôt
 gescreven: Blankflos were dôt;
 445 dat Flos dat lese unde vorneme,
 wan he to deme steine queme,
 dat Blankflos de junkvrouwe reine
 begraven lege under deme steine.
 Ok hadde de konink rike
 450 twe bilde, de weren gelike,
 up deme steine gehouwen,
 dat mochten sein man unde vrouwen,
 twe breve in oren henden weren,
 also uns dat bôk wil leren,
 455 dar stunt inne gescreven dat,
 wo minnichliken Flos Blankflosse bat:
 „Hertelêf, nu kusse mi,
 sote lêf, des bidde ik di;
 ik hebbe di lêf boven allen schat
 460 unde vor allet dat got geschapen hât,
 ik hebbe di lever wen mîn lîf,
 nummer wert mi lever wîf!“
 Do sprak de andere brêf:

- ,Mîn levent wart mi nu so lêf
 465 also ik di hadde Flos,
 nu bin ik arme vroudelos!
 Disse bilde weren reine
 aldus gehouwen up deme steine:
 wan de wint to wegende begunde,
 470 de bilde an der sulven stunde
 dat eine den andern vor sinen munt
 kussede mêr wan dusent stunt,
 wan de wint sik lede nedder,
 so stunden de bilde stille wedder;
 475 also konden de bilde beren,
 rechte ift se levendich weren.
 Do Flos dissien stein ansach,
 jamerliken ome do geschach
 unde lêp dovendich van dan,
 480 dar he wiste louwen stân;
 to den louwen sprank he in
 unde wolde gerne des dodes sîn.
 De louwen lepen to Flosse dar,
 se en deden om arges nicht ein hâr,
 485 se lepen ome vruntliken to,
 dat wolde got van himmele also.
 Flos wart grimmich altohant,
 ein bein van eineme rinde he vant,
 darmede slôch he de louwen sere
 490 unde sprak: ,Bose aller dere,
 wille gi nicht eten vlêsch unde blût?
 darumme sche ju nummer gût;
 ik bin generet mit guder spise,
 van wennen kumt ju disse wise,
 495 dat gi mi armen nicht willen eten,
 hebbe gi juwer nature vorgeten?
 worde ju ein pert idder ein hunt,
 dat torete gi wal an korter stunt.
 Flos de schone junkhere
 500 slôch de louwen anderwerwe sere;
 he en konde den louwen nicht raden,
 dat se ome icht wolden schaden.
 To lesten Flos dat vornam,
 dat ome van den louwen nicht arges quam;
 505 do gink Flos drovich van dan,
 de konink to vrouwende sik began,
 dat dede ôk de koninginne
 unde alle dat ingesinne,
 dat ome nicht arges was beschein,
 510 unde spreken: ,Dit hebbe wi besein,

- van gode is dit wonder komen,
 dat he neinen schaden heft genomen.⁴
 Got dit aldus hebben wolde,
 went Flos dat lant bekeren solde. —
- 515 De koninginne to deme koninge sprak:
 ‚Wi dôn Flosse grôt ungemak,
 dat wi ome nicht sagen an korter vrist,
 wo dat umme Blankflosse ist.⁴
 De konink sprak: ‚Leve sone mîn,
- 520 Blankflos de junkvrouwe fîn,
 wi hebben se geven umme riken schat
 unde eddele steine, wete dat.⁴
 Sineme vadere antworde he do
 unde sprak: ‚Gi segen mi gerne vro,
- 525 des sage gi mi gude mere,
 des hebbet dank, vader unde here,
 ik vant gescreven up deme steine grôt,
 dat Blankflos lege darunder dôt;
 ifte se dar nicht en were,
- 530 des wolde ik mi vrouwen sere
 unde hope lange to leven;
 got de mochte mi wal geven,
 dat ik aldar noch queme,
 dar ik Blankeflosse vorneme.⁴
- 535 Do bot de konink rike
 deme meinen volke al gelike,
 dat se den stein upwogen
 unde van deme grave drogen.
 Do dat graf was gegraven dêp,
- 540 des waters vele darût lêp;
 Flos wart do enwâr,
 dat Blankflos nicht was dar.
 He vrouwede sik unmaten sere
 unde sprak: ‚Vader, leve here,
- 545 wille gi mi beholden dat leven,
 ein deil des schattes sulle gi mi geven,
 de vor Blankflos is genomen,
 dat mach mi wal to troste komen;
 darto gevet mi den kôpman,
- 550 de Blankeflosse vôrde van dan,
 de sal mi bringen up de vart,
 dar Blankeflos wart hen gekart.
 Des wart der konink vullen vro,
 dat Flos hadde gesproken do,
- 555 unde wart vro an sineme mude
 darto de koninginne gude,
 se geven Flosse des he on bat,

- beide wandes vil unde schat,
 darto dene sulven kôpman,
 560 de Blankeflosse vôrde van dan.
 Do gink der junkhere wal gedân
 vor sinen vader dene konink stân,
 he nam orlof van kinde to kinde
 darto van alleme ingesinde
 565 unde hôf sik an de vart
 na siner herteleven wart.
 He gink to deme rosse sîn,
 de koninginne sprak: „Lever sone mîn,
 ein golden vingerlîn wil ik di geven,
 570 dat sal di beholden dîn leven,
 it mach beter nicht gesîn,
 dat love up de truwe mîn.
 Van siner nature wil ik di sagen;
 he wert nummer dôt geslagen,
 575 de dat heft an siner hant,
 dat vure one ôk nicht vorbrant.“
 Flos sprak: Gude nacht, levé muder mîn,
 ein scheident dat mût jummer sîn.“ —
 Van danne reit de schone junkhere
 580 unde was bedrovet vil sere.
 Des avendes he to der herberge quam,
 sîn werdinne one schire vornam;
 bi deme vure dar he sat,
 de werdinne one sere bat
 585 unde vragede, van wennen he were?
 Do sprak Flos, de schone junkhere,
 mit listliken sinnen
 antworde he der werdinnen;
 he sprak: „Ik bin ein kôpman twâr,
 590 dat sage ik ju openbâr,
 unde vare aldus achter lande
 mit kostlikem wande.“
 De vrouwe sprak: „Des sît bericht,
 ik vrage ju ane sake nicht,
 595 hir was ein junkvrouwe eine nacht,
 dar hebbe ik vakene up gedacht,
 Blankeflos was se genant;
 ik hebbe der lude vele bekant,
 geliker lude en sach ik ni
 600 so gi twe sint, des lovet mi.
 Sere bedrovet was ore mût,
 mi dunket wo gi ôk also dût;
 got de helpe ju beiden
 van sorgen unde van leiden!“

- 605 Do Flos disse rede vornam,
 grote vraude ome darvan quam,
 dat se van Blankeflosse sprach.
 Eine kleine stunde darnach
 gaf he der vrouwen einen nap van golde,
 610 de was gesirot also he solde.
 Weset des van mi bericht,
 de beste nap en was dat nicht,
 den behelt he stille
 durch Blankeflosses willen.
- 615 He gaf ore ôk einen mantel gût,
 darvan nam se hogen mût.
 Flos sprak to der werdinnen:
 ‚Dit hebbet durch Blankflosse minnen.‘
 De werdinne sprak: ‚Flos, leve junkhere,
 620 ik danke ju vil sere,
 got geve ju lucke, wor gi ju wenden,
 unde mote ju drade to Blankflosse senden.‘
 Des andern dages vullen vro
 Flos van danne scheidede do;
- 625 Blankeflosse he nicht vorgat.
 Do he to Rome quam in de 'stat,
 Flos tohant ein vragen began,
 ift dar were jenich man,
 de one berichten konde,
 630 dar he umme vragen begonde,
 wor he Blankeflosse vunde?
 Deme wolde he danken to aller stunde.
 Eine gude vrouwe quam dar gegangen
 unde sprak: ‚Blankflos wart hire entfangen,
 635 van Babilôn des koninges mannen,
 de vôrden de.junkvrouwen van dannen,
 de koften se vor riken solt,
 beide vor sulver unde golt;
 van ore en weit ik anders nicht,
 640 se is to Babilôn, des sît bericht.‘
 Flos de richtede sine vart
 hen to Babilone wart.
 Dar he up deme wege reit,
 hadde he mannich herteleit,
- 645 Blankflos ome vil vroude benam.
 Des avendes, do he to der herberge quam,
 sere bedrovet was sîn mût,
 deme live dede he kleine gût.
 De wert Flosse to vragen began:
 650 ‚Wille gi nicht eten, hovesche man,
 worup denke gi so sere?‘

- Flos sprach: „Ik drage grote swere.“
 Sin wert begonde one over to vragen:
 „Van wenne sint gi, des bidde ik ju sagen.“
- 655 Flos antworde sineme werde dar:
 „Ik bin ein kôpman, dat is wâr,
 ik kome van vromeden landen here,
 wes vrage gi mi so sere?“
- De wert sprach: „Nu merket dat,
 660 here, ik vrage ju sunder hat,
 hir weren kôplude van Babilone,
 de hadden eine junkvrouwen schone,
 se was geschapen also gi sîn,
 des lovet up de truwe mîn;
- 665 Blankeflos de vrouwe heit,
 twe so gelik ik nergen weit.“
 Do he van Blankeflosse sprach,
 eine korte wile darnach,
 Flos leit sik do vordragen
- 670 einen nap van golde geslagen,
 dat was nicht de nap reine
 mit deme duren lichten steine,
 einen anderen nap leit he sik winnen,
 den gaf he ome durch Blankflosse minnen.
- 675 De wert wart der gifte vro,
 groten dank sede he ome do
 unde was Flosse bedênsthâft
 alle de tît mit ganzer kraft.
 Do Flos de wârheit an ome vornam,
- 680 mit behenden reden he bi one quam
 unde sprach: ift he dat helen wolde,
 dat he ome sagen solde,
 dat wolde he vorschulden twâr
 mit sulvere unde mit golde klâr.
- 685 Flos begonde deme werde to bichten
 unde sprach: „Kunne gi mi berichten
 na Blankeflosse der leven mîn?
 Durch se so lide ik grote pîn.“
- De wert do to Flosse sprach:
 690 „Helpen ik ju nicht en mach,
 de konink Blankflosse so lêf hât,
 dat ik en weit neinen rât;
 up eineme torne lêt he se rouwen
 mit vif unde twintich junkvrouwen,
- 695 de sullen Blankeflosse leren,
 dat se sik to deme koninge wille keren,
 dene sulven torne hebben ummedân
 negen muren sunder wân,

- de sulven muren sint besat
 700 mit drên greven, wetet dat,
 ein juwelik darumme denet,
 wente se sint darvan belenet,
 ôk hebben de greven drî
 drên broderen, des lovet mi,
 705 bevalen dat leste dore,
 dar mach nemant komen vore;
 hirumme mach di dat nicht beschein,
 dat du Blankflosse mogest sein.
 Flos de kindesche man
 710 an sineme werde dat vornam,
 dat he ome van vrochten grôt
 nicht helpen wolde an siner nôt;
 do sprak he to deme werde sîn:
 ‚Got wese dat lôn dîn,
 715 dat du mi gevest guden râd,
 nu dat umme Blankflosse also stât;
 ik wille afdôn alle stücke
 unde tein to Babilôn up gelucke
 unde vorkopen mine ware,
 720 dat ik to lande wedder vare.
 De wert sprak to Flosse dar:
 ‚Ein dink rede ik di vorwâr,
 dat ik di nummERMÊR en melde,
 got di dine gave vorgelde.‘ —
 725 Flos hôf sik up de vart
 hen to Babilone wart.
 Des sulven dages he dar quam,
 leide mere he vornam,
 negen muren sach he do,
 730 de umme dene torne gingen ho,
 de eine der anderen so vere lach,
 dat men dar schone pallase ane sach;
 de greven woneden darinne
 mit alle oreme ingesinne,
 735 de greven hadden schone wif,
 wal gesiret was ore lif.
 Flos hôf it wîsliken an,
 vor de ersten porten gink he stân,
 ein vingerlîn hadde he in siner hant,
 740 darinne stunt ein adamant,
 deme portenere he dat vingerlîn gaf,
 he sprak: ‚Werf mine bodescaf
 unde sage den vrouwen fîn,
 mîn kram sal on bereide sîn,
 745 unde hebbe ôk vil eddeler steino

- beide grôt unde kleine,
 darto pellen unde siden want,
 dat mogen se beschouwen altohant;
 hebben se penninge idder nicht,
 750 se werden wal van mi bericht;
 ik bin here komen an vromede lant,
 ore vruntscop hadde ik gerne bekant.
 De portener nam dat vingerlîn
 unde sprak: „Ik wille ju ein gût bode sîn.“
 755 Do gink he to der vrouwen sîn
 unde sprak: „Vil leve vrouwe mîn,
 hire is ein man vor juwer porten,
 de heft to kope des gi nu en hórten,
 de wolde gerne vor ju komen,
 760 mochte ome dat dôn vromen.“
 De grevinne sprak: „Leve portenere,
 lat dene kôpman komen here,
 wi willen ome afkopen unde gelden,
 dat he uns nicht sal schelden.“
 765 Do gink de portener van danne
 na Flosse deme hoveschen manne,
 he slôt up de ersten porten,
 de to den negen muren hórten;
 binnen de muren quam do Flos,
 770 siner sorge wart he ein deil los.
 Flos mit dogentliken sinnen
 gink hen vor de grevinnen,
 he wisede ore de eddelen steine
 beide grôt unde kleine,
 775 unde mannigerhande sîrheit.
 Flos sprak: „Dit sal ju wesen bereit.“
 Se koften ome af, unde he gaf in,
 dat dede he alle durch sîn gewin.
 Ein deil nam he des klenodes sîn
 780 unde sande dat der anderen grevin,
 he sprak to ore mit sinne:
 „Got grote ju, eddele grevinne;
 wes gi nu van mi begeren,
 beide junkvrouwen unde heren,
 785 van eddelen steinen unde van siden,
 des wil ik ju wal twiden.“
 Der vrouwen he do ein vingerlîn gaf,
 ander klenode kofte se ome af.
 To der dreden grevinnen quam he do,
 790 Flosse se afkoften unde weren vro.
 Also quam he vor de lesten porten,
 dar de dre brodere to hórten;

- de eine broder quam dar gegân,
 he sprak: ‚Wat wultu, kindesche man,
 795 vor disser porten vorholen,
 up unse lif is se uns bevolen;
 worumme bistu her gekomen,
 wultu uns schaden idder vromen?
 Drade du van hinnen vare
 800 unde nim mit di dine ware.‘
 Flos de rede an sik nam,
 dogentliken he ome antworten began:
 ‚Her portenere, tornet ju nicht,
 wente doch vil dicke schicht,
 805 dat ein kôpman komet vil,
 dar men siner nicht hebben wil;
 mines klenodes sulle gi wat hân,
 ift ju dat nicht willen vorsmân,
 ein vingerlîn wil ik ju geven,
 810 dar denket mir bi, de wile gi leven.‘
 Do he disse rede hôrte,
 upgesloten wart de porte,
 alle dre brodere gingen to ome do,
 des wart Flos vil sere vro;
 815 se heten ome willekomen sîn
 unde leten ome schenken vil guden wîn.
 Flos wolde nicht van danne keren,
 he dede den broderen mêr to eren
 unde sprak: ‚Alle dre sulle gi komen
 820 unde nemen van mi, dat mach ju vromen,
 beide golt unde eddele steine,
 dat gi mîr denken algemeine.‘
 Se spreken: ‚Flos, leve junkhere,
 wi danken ju vil sere.‘
 825 Flos to deme einen brodere sprach,
 dene he ersten vor der porten sach:
 ‚Ik queme ju gerne mit vruntscop an,
 ift gi wolden werden mîn man,
 hundert mark goldes wil ik ju geven,
 830 darmede moge gi vroliken leven,
 hîrumme hebbet einen guden mût
 unde entfât disse rede vor gût.
 Ik bin gekomen ût vromeden lande
 unde bedarf wal vrunde mannighande.‘
 835 To Flosse sprak de portenere:
 ‚Vornemet mine wort, vil leve here,
 mochte ik juwe golt vorschulden,
 dat ik bleve bi juwen hulden,
 dat wete got van himmelrike,

- 840 dat ik dat neme sekerlike.
 Jodoch sal juwe wille schein,
 der manscop wille ik ju gein.
 Do he ome der manscop hadde bekant,
 hundert mark gaf he ome in de hant,
 845 des wart de portenere vro,
 dat golt drôch he to der herberge do;
 drade begonde he wedder to keren
 to Flosse sineme junkheren.
 Do sprak Flos: ,Vil leve man,
 850 eine rede wil ik heven an
 unde wil di mine sorge klagen,
 de soltu mi helpen dragen;
 wultu dat dôn mit truwen,
 dat en sal di nummer ruwen,
 855 godes hulpe unde dine
 mogen mi helpen van aller pine:
 Blankeflosse de schonen junkvrouwen
 de wolde ik gerne schouwen,
 des is leider mannich dach,
 860 dat ik se lest mit ougen sach;
 ik hebbe se lêf, des wes bericht,
 des en wolde mîn vader de konink nicht,
 van Hispanien is he genant,
 ein weldich konink over alle dat lant.
 865 He heit mi riden út deme lande,
 de wile he Blankeflosse vorsande;
 he leit se geven umme riken schat,
 dat dede he al umme dat,
 dat se nicht en worde mîn wif.
 870 Ik hebbe se lever wen mîn lif,
 durch disse nôt bin ik hergekomen,
 dat ga mi to schaden idder to vromen;
 wultu truwe to mi holden,
 so mach ik wal vroliken olden:
 875 help mi, dat ik Blankflosse se,
 dat uns nummer leit gesche.
 De portener sprak to der sulven stunt:
 ,Flos, dine minne dôstu mi kunt,
 goldes vil hestu mi gegeven,
 880 darmede mach ik vroliken leven,
 manscop hebbe ik di gedân,
 der wil ik di nummer afstân;
 ik vruchte, wi moten des dodes wesen,
 Blankeflos mach ôk nicht genesen
 885 vor deme koninge unseme heren.
 He heft Blankflosse lêf gar sere,

- se is sines herten leitvordrif,
 unde heft se lever wen sin lif;
 jodoch sal dat wal gelingen,
 890 up dene torne wil ik ju bringen.
 Flos sprak: ‚Got mote sin din lôn,
 dat du so wal wult bi mi dôn.
 De portener gink do mit liste,
 dar he sine brodere wiste.
 895 He sprak: ‚Dat is mi wal gegangen,
 hundert mark goldes hebbe ik entfangen
 van Flosse deme riken heren,
 des sulle gi mi nicht vorkeren,
 gi sullen ôk werden sine man
 900 also ik tovoeren hebbe gedân.
 Des goldes weren se vil vro,
 Flosses man worden se do.
 De Flosse de manscop hadde ersten gedân,
 he sprak: ‚Brodere, wi willen gân
 905 dar wi mogen delen dat golt,
 wi wesen Flosse mit truwen holt.
 Flos de hôrde disse rede,
 sere wal was ome darmede.
 he sprak: ‚Des goldes en delet nicht,
 910 weset des van mi bericht;
 tein werve mêr wil ik ju geven,
 alle dre moge gi rikliken leven.
 Do sprak de eine disse rede,
 de Flosse de manscop ersten dede:
 915 ‚Wi willen dat golt to der herberge bringen
 unde helpen Flosse to sinen dingen.
 Dat golt se mit sik van danne nemen,
 to Flosse se drade wedder quemen.
 Nu horet van deme portenere,
 920 got geve ome lucke unde ere,
 de ersten worden was sîn man;
 sine brodere sprak he an:
 ‚Wes Flos sik mach to ju vorsein,
 des sulle gi mi der wârheit gein,
 925 wente he heft vns vele geven,
 dar wi mogen wal van leven,
 dat wille wi holden bi unser ere,
 Flos sal bliven unse rechte here;
 wi hebben ome dênst gesworen,
 930 dat wert nummer an ome verloren.
 Flos sprak: ‚Got mote juwe lôn bliven,
 dat gî mîn leit willen vordriven,
 bi Blankeflosse der leven mîn

- wolde ik so gerne sîn,
 935 durch se ik hergekommen bin,
 se heft berovet mir den sîn.
 De brodere spreken: „Des sît wis,
 juwe lange levent uns lêf is,
 Blankeflosse de sulle gi sein,
 940 juwe wille de sal schein,
 wi willen ju up dene torne bringen,
 got late ju dat wal gelingen.“
 Flosse was umme dene torne unmere,
 den broderen dankede he vil sere.
- 945 Darna stunden se unde dachten,
 wo se Flosse up dene torne brachten.
 De oldeste broder to den andern sprach:
 „Vil drade kumt ein dach,
 dat wi den junkvrouwen blomen bringen,
 950 so mach uns dat wal gelingen:
 Flosse wille wi laten sniden
 van sindale unde ôk van siden
 kledere lîk den blomen dâ, n,
 de sal he ane hân,
 955 unde dragen one mit den blomen fîn
 up dene torne in eineme korvekîn.“
 Se worden des to rade do,
 dat se wolden dôn also. —
- Do de kledere weren bereit,
 960 do wart lenger nicht gebeit,
 an einen korf wart he gestreckt,
 mit blomen fîn wart he bedeckt;
 den junkvrouwen se de blomen brachten,
 dene einen korf se wal bedachten.
- 965 Do se up dene torne quemen,
 de junkvrouwen de blomen to sik nemen,
 de eine korf wart gesat
 in Blankflosse kameran, wete dat;
 dar brachten se Flosse in vorborgen,
 970 dat deden se mit groten sorgen.
 Vor de porten se wedder gingen,
 groten vrochten se entfingen
 unde sorgeden do vil sere,
 dat galt on beide lif unde ere.
- 975 De junkvrouwen weren alle vro,
 mit den blomen spelden se do,
 men Blankeflos, de zarte reine,
 gaf sik to den sorgen alleine,
 se wart nummer guden hogen,
 980 se hadde Flosse an or herte getogen,

- nummer wolde se vroliken leven,
 se hadde sik to den sorgen geven.
 Clarissa de junkvrouwe fin
 to orer kameran gink se in,
 985 dar vant se blomen mannigerhande,
 de nam se an ore snewitten hande;
 se dachte, eine blome ik gerne vunde,
 dar ik Blankflosse mede hogen kunde.
 Clarissa de blomen werp hire unde dar,
 990 Flosse wart se enwâr,
 se rêp lude: ‚Wapene, here!‘
 Se wart vorscricket rechte sere.
 De junkvrouwen hörden do dene schal,
 dat Clarissa lude rêp overal.
 995 Se sprak: ‚Junkvrouwen, vruchtet nicht,
 wente mi nicht arges beschicht;
 van einer blomen mi dat quam,
 dat ik dene angest to mi nam,
 se was mit andern blomen fin,
 1000 ore gelik mach nicht en sin,
 van der blomen is mi dat beschein,
 des mût ik ju der wârheit gein.‘
 Clarissa gink dar Blankflos sat,
 minliken dat se se bat:
 1005 ‚Ga wi in de kameran dîn,
 dar sach ik eine blomen fin,
 de duchte mi so schone wesen,
 diner sorge soltu wal genesen;
 de sulve blome is also gedân,
 1010 se maket di diner sorgen ân.‘
 Blankflos sprak: ‚Got lone di,
 dat du so gerne vrouwedest mi,
 doch meret sik mîn ungemach
 beide nacht unde dach,
 1015 dat steit mit mi leider also,
 dat ik nummer werde vro,
 ik en se de blomen alleine,
 de ik mit ganzen truwen meine;
 de is mi leider alto vere,
 1020 ik vruchte, ik se se nummermere.‘
 Clarissa sprak: ‚Leve Blankeflos,
 ik sege di gerne sorgelos,
 ik wise di eine blomen fin,
 de dines herten trôst sal sîn;
 1025 de blome is ôk also gestalt,
 se gift di vroude mannichvalt.‘
 Blankflos to Clarissen sprach:

- ,Ik en weit nicht, wat it helpen mach,
 dat du mi beswerest also sere,
 1030 vrolik en werde ik nummermere,
 mi mach nu neine vroude beschein,
 doch wil ik gerne mit di gein,
 wente ik hebbe dat wal vorstân,
 alle de sorge, de ik hân,
 1035 de sint di leit, dat weit ik wal,
 got van himmele di lonen sal.
 Blankflos mit Clarissen gink
 in de kameran, dar se vroude entfink,
 alle ore sorge moste vorgân,
 1040 Flosse vant se darinne stân,
 ore troren moste sik do maten;
 vor Clarissa konde se des nicht laten,
 minnichliken se to Flosse gink,
 mit armen se one ummevink,
 1045 orer ein dene andern kussede do,
 ore herte weren beide vro;
 de leve was gensliken dar,
 dat rede ik ju vorwâr.
 Blankflos to Clarissen sprach:
 1050 ,Also leve mi nu en schach
 also mi nu is, dat mût ik gein,
 mi mach nummer lever schein,
 dat is de blome, de ik meine,
 mîn himmel unde mîn trôst alleine,
 1055 disse blome mach mi wal vroude geven,
 unde hope lange mit or to leven;
 ik hebbe disse blome ûtirkoren
 vor allet, dat ju wart geboren.
 Clarissa, mi is so rechte wal,
 1060 ik en weit nicht, wat ik spreken sal
 van groter leve, de ik hân;
 alle mîn trorent wil ik lân,
 got unde disse blome fin,
 de losent mi wal van aller pin.
 1065 Clarissa sprak do to on beiden:
 ,Got behode ju vor leiden,
 dat dit nu vorholen si,
 dat helpe got ju unde ôk mi;
 ik rede dat bi miner ere,
 1070 dat ik ju melde nummermere.
 De sunne begonde nedder gân,
 Clarissa leit Blankflosse vorstân
 unde sprak: ,Ik vruchte vil sere
 des koninges kemenere,

- 1075 de darto gesettet sîn,
 dat se maken dat bedde din,
 dat se Flosse mochten sein,
 so were ju beiden leit geschein;
 waret ju vor dissen dingen,
- 1080 so mach ju beiden wal gelingen.
 Disse rât de was vil gût,
 Flos de wart also behût.
 Darna eine kleine wile,
 wal to einer halven mile,
- 1085 de kemenere quemen, dat is wâr,
 unde makeden dat bedde dar,
 do se den dênst hadden gedân,
 men heit se van der kameren gân.
 Flos do Clarissen bêt
- 1090 sinen dênst, des was wal nôt,
 unde dankede or vor alle dink,
 de se mit on beiden begink.
 Clarissa sprak: „Ik wil ju sagen,
 ik wil it mit ju beiden wagen,
- 1095 ik do ju minen dênst durch dat,
 dat gi sult leven desten bat,
 ik mût doch wesen juwe truwe
 unde sein, dat mi dat nicht en ruwe.“
 Do de sunne gink an golt,
- 1100 Clarissa was Blankflosse holt
 unde sprak: „Gi sullen ju nicht scheiden,
 up disseme bedde sulle gi rouwen beide,
 an den blomen wil ik bliven,
 darinne wil ik de nacht vordriven;
- 1105 got de mote juwer plegen,
 also wil ik ju beide segen.“
 De twe leven to bedde gingen,
 mit armen se sik ummevingen,
 na tosamenende dat se legen,
- 1110 vil groter vroude se do plegen,
 orer ein dem andern begunde to sagen,
 wat he sorge hadde gedragen
 unde mannigerhande herteleit,
 des wart vorgeten up minen eit.
- 1115 Dar leden se brust tegen brust,
 unde lêf van leve wart gekust,
 de leve, de se beide dreven,
 de wart nu van twên leven gescreven,
 ore leve de wart vroudenrik,
- 1120 dat nu wart der vroude gelik,
 aller vroude hadden se genôch;

- to lesten se de slâp bedrôch,
 dat se slepen went an den morgen
 an blanken armen ane sorgen. —
- 1125 De konink eines sedes plach:
 des morgens, wan up gink de dach,
 Blankflos moste to ome gein,
 he wolde se darumme sein,
 ift he ore dar nicht to spreken solde,
- 1130 dat se one hebben wolde;
 hirumme leit de konink rike
 vor sik komen de junkvrouwen minnichlike.
 Eines morgens de konink dat vornam,
 dat Blankeflos nicht vor on quam,
- 1135 he sprak to deme kemenere sîn:
 ‚Wultu dôn dene willen mîn,
 so vrage eine junkvrouwen fin,
 wo dat umme Blankflosse moge sîn.‘
 ‚Here, dat do ik altohant,
- 1140 ik sage ju, wo dat is gewant.‘
 De kemener rôrde an de dore,
 ein junkvrouwe quam darvore,
 se sprak to ome: ‚Wat wultu hir?‘
 De kemener sprak: ‚Sage mir,
- 1145 worumme Blankflos de junkvrouwe fin
 nicht kumt vor dene heren mîn?‘
 De junkvrouwe leit dene kemener stân
 unde sprak: ‚Ik wille gân
 unde wille drade wedder komen
- 1150 unde sagen di, wat ik hebbe vornomen.‘
 De junkvrouwe gink tohant,
 dar se Blankeflosse vant,
 in de kameren se do sach,
 dar Blankeflos bi Flosse lach,
- 1155 se hadden sik beide ummevangen,
 de tît mochte on nicht vorlangen;
 der junkvrouwen was nicht kunt,
 de dar buten der kameren stunt,
 welk Flos idder Blankflos mochte sîn,
- 1160 se weren beide so rechte fin.
 De junkvrouwe sprak: ‚Up minen eit,
 solde ik se scheiden, dat were mi leit;
 ik sach nu so gelike twe,
 dat on beiden leve gesche!‘
- 1165 De junkvrouwe gink mit liste,
 dar se den kemenere wiste;
 se sprak: ‚Wes des bericht,
 Blankflos de en komet nicht,

- se heft eine junkvrouwen ummevangen,
 1170 or mundelin drucket an ore wangen,
 de junkvrouwe is van vromeden lande,
 dat ik se nicht en kande,
 se is so minnichliken gelegen vor oreme munde,
 dat ik se scheiden nicht en kunde;
 1175 also hebbe ik van on gesein,
 dat mochtstu vor deme koninge gein.
 Do de kemener wedder quam,
 de konink to vragende on began,
 wo dat jummer wesen solde,
 1180 dat Blankeflos nicht komen wolde?
 De kemener sprak: „Ik weit des nicht,
 dat môt wesen van ungeschicht,
 eine junkvrouwen hadde ik to or gesant,
 rechte heft se mi bekant,
 1185 wo se eine junkvrouwen heft ummevangen,
 or mundelin drucket an ore wangen.“
 De konink út deme bedde sprank,
 ein scarp swert grêp he an sine hant,
 he sprak: „Hebbe ik dat rechte vornomen,
 1190 dar is ein up minen torne komen,
 daromme en wil Blankflos mi nicht hân.“
 Do gink he vor de kameran stân;
 up deme bedde sach he se beide,
 do dede he on nicht to leide,
 1195 he vragede sinen kemenere,
 welk Flos idder Blankflos were?
 De kemener sprak altohant:
 „Here, dat is mi unbekant,
 unde wille dat nemen up minen lif:
 1200 ik en weit nicht, welk de man is idder dat wif.“
 De konink swôr bi eden grôt,
 he wolde se beide slân dôt.
 Do sprak de kemenere gût:
 „Here, sachtet juwen mût,
 1205 woromme wolde gi se dôt slân?
 Latet dat recht over se gân.“
 De konink sik bedachte
 unde sinen mût do sachte;
 van deme torne gink he do,
 1210 des was Flos unde Blankflos vro. —
 Des koninges welde de was grôt,
 alle sinen mannen he entbôt,
 dat se quemen to sineme rechte,
 beide riddere unde knechte.
 1215 Dar quam vil mannich vrouwe unde man,

- de Flosse unde Blankflosse segan an.
 Flos unde Blankflos mosten gân
 to dem richte vor den konink stân;
 de konink alle sine man
- 1220 eines rechtes vragen began:
 „Ift dat mit rechte mochte wesen,
 se en mochten beide nummer nesene,
 wente ik se seven werve mit golde
 up leit wegen, also ik van rechte solde,
- 1225 to wive wolde ik se hebben nomen,
 dat mach or wal to schanden komen.
 Darumme dat se mi nicht wolde hân,
 so wil ik se nu wedder vorsmân:
 dat se bi eineme manne geslâpen hât
- 1230 up miner veste, wetet dat.
 Do spreken se alle gemeine
 beide grôt unde kleine:
 „Men sal se enthoveden beide,
 dat spreke wi bi unseme eide.“
- 1235 Do sprak de konink in torne grôt:
 „Blankflos sal erst liden den dôt!“
 Do Flos dat vornam,
 vil unsachte ome dat bequam;
 he sprak: „Herteleve wîf,
- 1240 du bist mi lever den mîn lif.“
 Flos tôch ût der hant sîn
 ein klâr golden vingerlîn,
 Blankeflosse he dat bôt
 unde sprak: „Nim dat to diner nôd,
- 1245 ik wille di dat vorwâr sagen,
 du werst nummer dôt geslagen,
 de wile du hest dat vingerlîn
 an der witten hant dîn.“
 Blankflos tôch ore hant to sich
- 1250 unde sprak: „Got de behode mich,
 dat ik neme dat vingerlîn,
 up dat ik beholde dat levent mîn,
 unde lete di, sote man, vorderven, —
 ik wolde gerne vor di sterven;
- 1255 dat ik dinen dôt vorneme,
 mîn levent mi unsachte bequeme.
 Ik bidde di, lat mi deme dode geven,
 dat du, sote man, mogest leven;
 nu beholt sulven dat vingerlîn,
- 1260 darmede vorlengen dat levent dîn.“
 Flos sprak: „Ik en weit nicht wat ik sal,
 dat weit got van himmele wal;

- dîn ungemak dat is mi leit,
 dat wil ik nemen up minen eit.
- 1265 Dat du dene dôt solt anegân,
 dat is durch mine schult gedân;
 de konink hadde di lêf also sin lif,
 he hadde di koren vor alle wif,
 to einer koninginnen wolde he di maken,
- 1270 nu kumt dat van minen saken,
 dat du den lif solt vorlesen,
 den dôt wil ik gerne vor di kesen;
 hirurgme so nim dat vingerlîn,
 darmede vorlunge dat levent dîn.
- 1275 Ik sal van rechte des dodes sin,
 wente de schulde de sint mîn.
 Blankflos sprak: ,Ik mach dat klagen,
 mîn sote lêf, wat wultu sagen,
 dat du des dodes nu wult sin,
- 1280 dat kumt van den schulden mîn.
 Werestu to Hispanien bleven,
 umme den konink heddestu nicht gegeven;
 sote lêf, durch dene willen mîn
 so beholt dat vingerlîn,
- 1285 unde beholt darmede dîn leven,
 mines levendes wil ik mi begeven.
 Flos to Blankeflosse sprak:
 ,Ik hebbe darvan grôt ungemak,
 dat du nicht nemest dat vingerlîn,
- 1290 worumme wultu des dodes sîn?
 Dat was al durch mine schulde,
 dat du vorlorest mines vaders hulde,
 de sande di to Rome hin
 unde leit di geven umme groten win
- 1295 des riken koninges kôpluden,
 de wil uns nu scheiden huden:
 vil leve, nim dat vingerlîn,
 dat do durch dene willen mîn;
 lêf, dat soltu gerne dôn,
- 1300 so spreke ik di grôt godes lôn.
 Wultu jo des dodes wesen,
 mines lives wil ik nummer nesen;
 Blankeflos, des truwe mi,
 dat ik nummer scheide van di,
- 1305 ik wille mit di liden arch unde gût,
 allet dat uns de konink dût.
 Dat vingerlîn dede he ore in de hant
 unde sprak: ,Wes aller truwe gemant
 unde beholt dat vingerlîn,

- 1310 dat do durch dene willen mîn.
 Se sprak: „Ik wil des nicht beholden,
 got mote unser beide wolden!
 Nu du lenger nicht wult leven,
 mines lives wil ik mi ôk begeven;
- 1315 mach dat anders nicht en sîn,
 so do mi her dat vingerlîn.
 Se nam dat vingerlîn, dat is wâr,
 unde warp dat enwech dar
 vil verne van on beiden;
- 1320 do begunden to wenen de heiden
 beide man unde ôk de wîf,
 grote sorge hadden ore lîf
 van den jamerliken worden,
 de se van on beiden hörden.
- 1325 Ein hertoge was ôk dar,
 orer twier rede nam he war
 unde nam up dat vingerlîn,
 dat duchte ome vil gût sîn,
 wente he sulven hadde gehôrt
- 1330 van on beiden ore wort. —
 De rike konink wolde,
 dat men se enthoveden solde.
 De on de hovede solde afslân,
 nicht gerne wolde he darto gân,
- 1335 ift he dat laten dorste.
 Vil mannich eddele vorste,
 de hadden dar drovigen mût,
 darto vil mannich vrouwe gût;
 vil jamers se do plegen,
- 1340 do-se dat an on segen,
 dat Blankflos van des koninges knechten
 genomen wart bi oren vlechten.
 Blankflos leide or horet dar
 over einen schilt, dat is wâr,
- 1345 dat swert upheven he began
 unde wolde or dat horet afslân,
 Flos entfenk des swerdes slach,
 jamerliken dat he sprach:
 „Mîn horet wil ik vor di geven,
- 1350 up dat du beholdest dîn leven,
 wente de schulde de is mîn,
 darumme beholt du dat levent dîn.
 Blankflos moste bi siden gân,
 men solde Flosse dat horet afslân.
- 1355 Do dat Blankeflos ansach,
 dat Flosse werden solde de slach,

- se sprak: ‚Herteleve Flos,
nu bin ik arme vroudelos.’
Dene slach entfenk se mit orem live
1360 unde sprak: ‚Owi, mi armen wive!
Solde ik minen tröst vorlesen,
den dôt wil ik lever kesen!’
Se nam sik sulven bi den vlechten
unde gaf sik des koninges knechten,
1365 se sprak: ‚Ik bidde ju umme gode,
dat gi dôn des koninges bode
unde laten mi dat hovet afslân
unde Flosse dat levent hân;
ik arme wille mi deme dode geven,
1370 up dat min leve lêf moge leven.’
De hertoge to deme koninge sprach:
‚Groter leve ik nu en sach
also disse twe hebben under sik,
nu wil ik, here, bidden dik,
1375 dat du sachttest dinen mût,
here, dat dunket mi wesen gût,
lât se nicht doden binnen drên dagen,
so moge wi van der leve sagen,
ift juman queme in dat lant,
1380 dar he alsulke leve vant;
hirumme dode se nicht, konink here,
des hestu lof unde ere.’
Do sprak de konink: ‚Se hebben dach,
dat kome darna wo it mach.’ —
1385 Vor dene konink se do beide gingen,
alle de lude se wal entfingen,
sik vrouwede junk unde alt;
ore vroude de was mannichvalt,
dat ein juwelik sîn leven
1390 wolde vor des andern geven.
Se spreken alle gemeine
beide grôt unde kleine,
dat dar nu nein man en quam,
dar he alsulke leve vornam.
1395 De konink do to Flosse sprach,
dat hôrde mannich unde sach,
ût sineme koninkliken munde
Flosse to vragende he begunde:
worumme ome Blankflos also lêf were?
1400 Do sprak Flos de schone junkhere:
‚Here konink, nu gi mi vragen,
so wil ik ju de wârheit sagen:
To Hispanien de konink dar

- sîn sone bin ik, dat is wâr,
 1405 mîn vader tôch út sineme lande,
 des koninges lant van Averde he brande,
 dar venk he eine grote schar
 van pelegrimen, dat is wâr;
 mank den pelegrimen weren
 1410 beide greven unde heren;
 van Vrankrike eines greven wif,
 minlik was gestalt or lif,
 de wart dar van on gevân,
 der wart geslagen ore man.
 1415 Do brachten se de grevinnen
 miner moder der koninginnen;
 mit kinde was de grevinne
 unde was bedrovet an oreme sinne,
 mîn moder de was ôk mit mi,
 1420 konink, dat wil ik sagen di.
 Vor deme meie in deme paschedage
 worde wi beide boren, also ik ju sage,
 do wi to der werlde quemen,
 de lude nicht so likes vornemen,
 1425 wi weren so gelik an deme gesichte,
 dat men uns onderscheiden mochte mit nichte;
 wi hadden uns lêf, des sît bericht,
 des wolde mîn vader de konink nicht,
 Blankeflosse he van sik sande,
 1430 also quam se to dissem lande.
 Do begunde ik vragen na er,
 aldus bin ik gekomen her.
 De konink Flosse vragen began,
 wo he up dene torne quam?
 1435 Flos sprak to der sulven stunt:
 „Dat do ik nummer manne kunt,
 ik en wil dat melden nummermere
 unde on nicht schaden an orer ere
 unde darto an oreme gude;
 1440 ik worde nummer vro to mude.“
 De konink sprak: „Bi minem eide,
 ik en do on nicht to leide,
 ik rede dat bi miner ere,
 ik en wreke it nummermere.“
 1445 Flos de kindesche man
 deme koninge sagen began:
 „Vor de ersten porten gink ik stân
 unde hof mîn gescheffe an,
 deme portenere gaf ik ein vingerlîn,
 1450 ik sprak: Wes du de bode mîn,

- unde ga to der grevinnen wal gemeit
 unde spreke, mîn kram sal or sîn bereit.
 Ein juwelik grevinne sande mi
 to der anderen, dat sage ik di;
 1455 so quam ik to der lesten porten,
 dar de dre brodere to hórten,
 de brodere worden mine man,
 dar ik grote vroude af nam,
 hundert mark goides gaf ik in,
 1460 her konink, nu wete gi minen sin.
 Do leten se mi kledere sniden
 van sindale unde ôk van siden,
 mank den blomen lach ik vorborgen
 in einem korve mit groten sorgen;
 1465 also wart dat do bedacht
 unde wart also up den torne bracht.
 Do ik up den torne quam,
 Blankeflos mi snel vornam.
 Ik mane di, konink leve here,
 1470 dat du bewarest dine ere;
 wultu se mit ichte haten,
 mîn levent wil ik vor se laten,
 wultu on jenige schulde geven,
 so dode mi unde lât se leven.
 1475 Blankflos sprak: „Dat mach nicht sîn,
 wente de schulde de sint mîn.
 Eddele konink, late mi dôt slân
 unde lât Flosse dat levent hân!“
 De konink sik disser rede vorsan,
 1480 sere lachen he began,
 he entsachtete sinen mût,
 unde wart on vruntlik unde gût,
 he sprak: „Bi minen sinnen,
 hedde ik gebroken disse minne,
 1485 so hedde ik gar ovel gedân,
 got wil or beider levent hân,
 nu se so wal geboren sint.“
 Do rêp beide man unde kint
 unde alle de dar weren,
 1490 beide hertogen unde heren:
 „Dank hebbe, konink unde here,
 nu deist du recht na diner ere!“ —
 Do leit de konink vor sik komen
 Clarissa to oreime groten vromen,
 1495 de nam he to sinen sulves live
 unde to einem herliken wive;
 Blankflos he do Flosse gaf,

- grote vroude krêch he daraf;
 de konink leit se tosamende geven,
 1500 do mochten se mit vrouden leven.
 Ok leit he halen de andern junkvrouwen
 van deme torne, he wolde se schouwen.
 Do se van deme torne quemen,
 grote vroude se dar vornemen:
 1505 de dar leve under sik drogen,
 de leit he do tosamende vogen,
 unde leit one goldes so vele geven,
 dat se mochten vroliken leven.
 De konink dede werscop altohant,
 1510 he wart gepriset over alle lant,
 also noch vil mannich dût,
 dem disse rede dunket gût. —
 Got de gaf Blankeflosse ein kint,
 dat was geheiten Vredelink,
 1515 se sette to gode herte unde lif,
 darna wart se konink Pipinges wif;
 se hadde gode vele to leve dân,
 konink Karle se bi ome wan.
 Se worden kristen altohant
 1520 unde bekêrden Hispanienlant,
 vor gode sullen se selich sin,
 dat is gar de love mîn.
 Darna wart it over heiden,
 do Flos unde Blankflos weren scheiden;
 1525 do bedwank se wedder sint
 konink Karle orer dochter kint,
 de ôk sodder vil mannich lant
 to der kristenheit bedwank. —

- Nu hebben disse rede ein ende,
 1530 got mote uns sine gnade senden
 unde helpen uns vroliken
 to dem ewigen himmelrike!
 Nu spreket alle Amen,
 ein islik sunder schamen. —

(Et sic est finis.)

De vorlorne sone.

- In godes namen heue yk an
also yk my des vorsynnen kan
so en ys nen man de dar leuet
vnde so grote sunde heuet
5 de ychtes moghe beghynnen
sunder godes mynnen
hyr bydde yk den süten cryst
de alder werle (*sic*) schepper yst
dat he my syne helpe sende
10 hyr to desseme elende
dat yk werde seghehaft
wedder aller thouer kraft
de my an vechten deghelyk
jk bydde den eddelen vorsten ryk
15 got mechtich vnde here
dat he mynen syn to deme besten kere
vnde vorlighe my dat yk moghe
spreken dat dy doghe
jn loue vnde in eren
20 ok bydde yk dy here
maryen de mynnichlyke maghet
de vns to den vrouden is bedaghet
dat se bydde vor my
ere leue kynt dat he myn helper sy
25 dat ik vulende dyt bokelyn
cryst vorluchte my den syn
wente yk byn des seker vnde vrut
dyne helpe ys to allen dynghen güt
we dyt buek wyl horen lesen
30 de scal al dore style wesen
vnde vornemen rechte myne wort
so mach he se reden vort
cryst suluen sy myn anbeghyn
vnde dar to de leue moter syn
35 Me spreket yd was eyn rytter fyn
he hadde nicht en kyndelyn
he was ok houesch vnde mylde
eyn helt vnder syneme schylde
wor he thorney vnde lust vornam

bl. 33^a 1)

b.

1) gegenwärtig 33^a ursprünglich 39. s. Die Einleitung.

- 40 aldar he myt manheyt quam
 jd were verne edder by
 syn lyf des eddelen rytters vry (?)
 sus stunt syn mot wyl menghen dach
 dat he anders nicht en plach
- 45 wen rechte rytters scheffe
 myt manheyt syner krefte
 dar mede he ghut vnde ero wan
 houesch was ok de sulve man
 To eynen tyden dat ghe vyl
- 50 dat de sulue rytter snel
 myt tuchten nam he orlof
 von syner vrowen vnde ouer hof
 he reynt in andere lant dorch loue
 vnde quam to eynes worsten houe
- 55 dar he dref myt groteme loue
 thorney lust vnde wedderspyl
 dar wan he vrouden vyl
 kone was ok de sulue man
 den prys he vor se allen wan
- 60 myt rechten rytter scheffe
 vnde myt manheyt syner krefte
 men wan lef den suluen deggen
 myt tuchten mosteme syner pleghen
 dat schach dorch syne houescheyt
- 65 de rytter was ok wol ghekleyt
 aldus was he dar eyn iar
 do vor langhede eme dar nar
 hen in syn eghe¹⁾ lant
 do dat den heren wart bekant
- 70 se bedroveden syk der scheyde
 doch wolde he up de reyde
 varen in der suluen stunt
 Do de rytter orlof nam
 aldus he van danne quam
- 75 hen in syn eghene lant
 dar he suluen was bekant
 de vrowe vntfenk den heren
 myt houescheyt vnde myt eren
 syn ghesynde dede ok also
- 80 syner kunste se weren vro
 En wynachten auende dat gheschach
 dat me wol des heren plach
 dar na se to bedde ghyngghen
 myt armen se syk vmme bevyngghen

bl. 34*

b.

¹⁾ Der n-Strich ist vergessen.

- 85 in ereme bedde beyde
 legghen se sunder leyde
 do sulues deme heren dwank
 syn nature ouer synen dank
 dat eme lustede syner vrowen
- 90 vmme sik beghunde he schouwen
 vnde wart eyner luchtynghen en war
 in der kemenaden openbar
 dar inne wart eyn stene¹⁾ hort
 vnde sprak aldus dane wort
- 95 du sunder lat de mynne syn
 vor werfstu nū eyn kyndelyn
 dat wert myt sele vnde myt lyue verloren
 jd ys bether vngheboren
 de rytter der rede sere vorscrach
- 100 so dat he syne mynne brach
 vnde to syner vrowen sprach
 dyt was eyn wonderlyk schyn
 myd des vorgghynk de wylle syn
 van angheste vnde ok van sorghen
- 105 dar na kort vn vorborghen
 vruntlyken grep he de vrowen an
 se sprak myn herte leue man
 latet nū blyuen desse scycht
 vor thornet vnsen heren nicht
- 110 he sprak myn wylle de mot schen
 myt des beghunde he do sen bl. 35.
 ouer de luchtynghen de quam dar
 vnde ok de steffe openbar
 vnde sprak sunder lat de mynne syn
- 115 vor werfstu nū eyn kyndelyn
 jd wert myt lyue vnde myt sele vorlaren
 dat were beter vngheboren
 der rede de rytter vnder quam
 de vruchte eme de mynne benam
- 120 Nu horet vorebat van der mynne thalen
 dar na to deme drudden male
 kerde he syk vruntlyken to deme wyue
 lustlyken myt synes sulues lyue
 he druchkede se an ere werden Brust
- 125 wol na synes herten lust
 do ouer de luchtynghen quam
 de steffe he ok al dar vornam
 vnde sprak nū vor weruestu dat kynt
 dat vyl yamers vor syk vynt

¹⁾ vgl. 156. 208.

- 130 dat wert myt lyue vnde myt sele vorlaren
 jd were beter vngheboren
 he dachte dyt ys al eyn droch
 synes herten wylle schude doch
 vruntlyken an der suluen vart
- 135 de eddele vrowe swangher wart
 dar na also de tyd was
 de eddele vrowe des kyndes ghenas
 dat sulue kleyne kyndelyn
 wort eyn fyn dat knepelyn
- 140 das wus vnde nam an dogheden to
 auent spade vnde morghen vro
 Do it to achte yaren quam
 de dot do den vader nam
 de moder settede to der schole dat kynt b.
- 145 wysheyt he beghunde leren synt
 also dat he wart kunsten ryk
 he was ok houesch vnde mynnechlyk
 leftalych vnde ok wol ghethoghen
 se worden alle ghudes haghē (o?)
- 150 alle de ene angheseghen
 Dar bevoren an monneghen dach
 went ene de moder an ghesach
 de doch duchte er eyne duster nacht
 dat quam van wenen vnde van suchten
- 155 wente se an dat luchten
 dachte dat de stemne dede
 aldus was ere pleghe sede
 vnder des wart de knape bolt
 van achtheyn yaren olt
- 160 do wart eme dat merket euen
 swert vnde wapene gheuen
 lef wunnen ene syne vndersaten
 he leuede myt en sunder haten
 De iunchere de quam ryden
- 165 van deme velde to enen tyden
 de moder vntfenk ene wyl wol
 also se van rechte don sol
 doch wenede se van herten sere
 do dachte de iunghe here
- 170 here ghot wat mach dyt beduden
 dyt wenent to allent (?) tyden
 he sprak leue moder myn
 ghat myt my in dat kemerlyn
 se let des nicht vnde dede dat
- 175 he sprak mīder sunder hat
 gy scholen my kortlyken saghen

- wor vmme gy monneghe claghe
 dot mit suchten vnde myt weynen
 edder wat gy dar mede meynen
 180 se sprak myn herte leue kynt
 jk mene hyr mede nicht eyn twynk
 men yk claghe dynes vader dot
 he sprak nen yt ys eyn ander not
 sprak de yunghelynk to hant
 185 de warheyt scal my syn bekant
 edder yk steke yw dor yuwe lyf
 bedrouet wart dat sulue wyf
 se dachte scholtu ghesesen
 vnde yd anders nicht mach wesen
 190 du scholt segghen de warheyt
 se sprak leue sone ghe meyt
 wultu noch mer dorch dynen thorn
 düen so bustu yo verloren
 moder han yk ok vndoghet
 195 vor beghan an myner yøghet
 nen du leue sone myn
 nu yd anders nicht mach syn
 so segghe yk dy algherycht
 wo gheschapen ys de schycht
 200 Ed mach doch luttich vromen
 dyn vader was enes heyme komen
 by auende do myt der yacht
 jn des hylghen crystes nacht
 eme vordroch syn mynlyke syn
 205 dat he leue sone myn
 wolde synen wyllen ghar
 an my vorvullen dat ys war
 dar wart drye eyn steme ghehort
 vnde sprak aldus dane wort
 210 du sunder lat de mynne syn
 vorweruestu nū eyn kyndelyn
 dat wert myt lyue vnde myt sele verloren
 dat vere beter vngheboren
 do sprak dyn vader it vere droch
 215 synes herten wylle schude doch
 dar van wurdestu gheboren
 des mostu ok syn verloren
 vnde wesen an der helle grunt
 dat ys myn sorghe to aller stunt
 220 he sprak myt ghudeme müde
 eya leue moder ghude
 wyl my ghod gheneren
 he mach my wol gheweren

b.

- vor den thouer vnde al ere schar
 225 de loue schal an my wesen ghar
 wor war weyt yk dat sekerlych
 he mach wol eyn hemmelrych
 my maken in der helle
 ofte ghut sy myn ghevelle
 230 men moder doet nu mynen raet
 myn dynk al to deme besten ghaet
 wyl cryst nu myn helper wesen
 so mach yk wor den touere nesen
 De moder sprak myn leue sone
 235 wat my yummer steyt to dunde
 des byn yk wyllych vnde bereyt
 he sprak moder yw sy gheseyt
 wy wyllen vorkopen vnse ghut
 moder also steyt my myn mot
 240 vnde gheuent hen in ghodes ere
 do sprak de vrowe here
 herte leue sone myn
 dynes wyllen schal ghevolghet syn
 jk wyl an eyn kloster varen bl. 37 *
 245 got mach dy wol bewaren
 se vorkoften achker vnde lant
 dar na kortlyk wart bekant
 de dot der eddelen vrowen cklar
 de yunghelynk dar nar
 250 gaf hen synes vader erue
 also yd eme duchte bederwe
 to klosteren vnde to kerken
 dar van he let werken
 he bedachte ok de armen
 255 wor he vornam se karmen
 ok beghunde he anschouwen
 armot armer iuncvrowen
 he delede em mede syne haue
 vnde dachte du scholt dy nu don aue
 260 der werlt alto male
 vnde scholt lyden quale
 Nv he syn ghut heft vorgheuen
 eyn luttych was eme noch na ghebeuen (*sic*)
 dar mede kofte he do gholt
 265 vnde dachte nu du wallen scholt
 wente yk anders nicht mach han
 so schal my dyt to steden stan
 dar na quam de yunghelynk
 synen prester he do by der hant vynk
 270 he sprak here nu gheuet my rat

- wente yt my enghestlyken stat
vnde sede eme algherycht
wo gheschapien was de schycht
do de prester syne wort
275 alto male hadde ghehort
he sprak desse dynek synt quat
ik en kan dy gheuen nenen ghuden rat
mer the hen to deme byscoppe wart
vnde segghe eme alle desse wort
280 de yk van dy han vornamen
lychte scal he dy to hulpe komen
de yunghelynk sprak dat scal schen
vnde beghunde dar henne ten
myt ghuden wyllen went he quam
285 dar he den byscop vornam
vnde claghede eme alle syne not
wo alle syn vrowede were dot
vnde sede eme algherycht
wo gheschopen were de schyt (*sic*)
290 de byscop sprak dat ys quat
ik en weyt dy leyder nenen rat
men dū scholt van hynne varen
to deme pawese sunder sparen
wente he vnse ghestlyke vader ys
295 he ys eyn man van oldere grys
du scholt ene spreken otmodelyk
vnde claghen em alle dyne schyt
so weyt yk wol du werst berycht
van eme dat dy to steden komet
300 vnde dy an dyner sele vromet
he dankede deme byscoppe sere
hen toch de yunchere
Aldar he den pawes want
he dede eme wytlyk vnde bekant
305 wo alle syne sake weren ghestalt
de pawes dachte up desse wort
de he van deme knapen hadde ghehort
vnde sprak blyf desse nacht alhyr
morghen so kum wedder to myr
310 denne segghe yk dy den besten rat
de de dy to sokende stat
.
. (*Lücke; es fehlt ein blatt.*)
.
vnde sprak to eme openbar
vrunt godes yk was de sulue bode
do syn vader wedder gode
315 vnde syn moder breken dat wort

b.

bl. 38^a

- de se van my hadden ghehort
des hadde got sere vorthornet syk
doch scholtu weten sekerlyk
got wyl eme gnade gheuen
- 320 dar licht eyne borch dat merke euen
van hynnen hondert myle werne
dar schal he wyllychlyken gherne
krupen uppe synen weren
der sprake der schal he vntberen
- 325 vnde blyuen dar eyn yar al vmme
vor der ghoten in eyner krumme
de dar vor der kokene yst
dar vynt he schottelwater wys
der alle myssen scal he syk neren
- 330 der besten spyse scal he vntberen
doch bynnen deme yare
eyn wort mach he wol spreken dare
wente dat yar nympt eyn ende
so mot de sulue elende
- 335 hyr wedder krupen in desse stede
aldus bleuen desse rede
vnde de stemne gar vorswant
deme werde wart de slap bekant
Des morghens do de dach upbrak
- 340 de ensedelynk to deme yuncheren sprak
wultu don na myner lere
so wyl got vuse here
dyner sele gheuen rat
de yunghelynk sprak nu merket dat
- 345 al scholde yk dusent dode lyden
juwer lere wyl yk nicht vormyden b.
bo sede he eme al de wort
de he van deme enghele hadde hort
des wart vro de yunghe man
- 350 he sprak nu nemet dat yk han
myn gholt dat yk hebbe hyr
jk wyl vorwullen goder gher
He lede sych nedder vnde krop
dor menneghen busch¹⁾ vnde slop
- 355 vnde dor menneghen scharpen stycken
he dachte luttych mykken
der pyne vnde al syn arbeyt
doch quam he vor de borch ghemeyt
dar wonede eyn crysten koningh ryk
- 360 de hadde eyne dochter mynnychlyk

s

¹⁾ s ist übergeschrieben = buch, vgl. 672 buch.

- se was wyttych vnde clar
 ere moder was in schoner var
 sus krop he vor de borch dore
 de portenere sach ene dar vore
 365 dat antlat duchte eme sere fyn
 vnde let ene in dat portelyn
 aldar wart yt wyder mere
 wo dar ghekomen were
 eyn kropel yunc vnde suwerlyk
 370 des quemen de vrouwen thogentlyk
 vnde wolden ene besen
 he krop vor en hen
 vor de kokene in de ghoten
 dar lach he vnvordroten
 375 de vrouwen sanden eme dor got
 des daghes spyse vnde brot
 des nam he syn ghenerte
 dat andere we des begherte
 gaf he dorch got to aller tyt
 380 dar na worden de meren wyt
 Dat de heydene wolden komen
 do dat de koningh hadde vornomen
 he let beden ower alle syn lant
 dat men begrepe alto hant
 385 de lant werne (?)¹⁾ vnde queme dar
 de koningh myt eyner groten schar
 de wart bereyt also yk las
 allent dat up der borch was
 dat moste mede up de wart
 390 sunder de koninghynne sart
 vnde ere dochter dat ys war
 de dorewarder blef ok dar
 to hus in der suluen vart
 de kropel moste ok nerghene varen
 395 de koningh wolde nich lengher sparen
 de reyse vnde toch van dan
 eme wolghede mennych stolt man
 Dar na nicht langhe an der suluen stede
 de kropel rechkede ut syne lede
 400 vnde krop de treppen up de mür
 he achtede nicht wart it em sur
 vnde sach deme volke nach
 de dochter to der moder sprach
 kan yk yt rechte vorstan
 405 so ys dyt eyn wolgheboren man

bl. 39 *

¹⁾ vgl. lantwere 624.

- eya leue moder myn
 gha wy to deme stummen hyn
 vnde vraghen em wat he meyne
 wente he ys dar alleyne
 410 do sprak de iuncvrowe clar
 kropel wultu mede dar
 he sprak myt eyne worde ya
 se sprak so segghe my sunder weyse
 wat wultu hebben up dyner reyse
 415 he sprak swart pert vnde swart wapen b.
 dat wart em alto hant gheschapen
 he wart rytterlyk bereyt
 vppe dat ros dat he screyt
 ane stegherrepe up dat part
 420 dat dore eme up ghesloten wart
 do yaghede he ut myt vroem mode
 do sprak de iuncvrowe ghude
 got mote syner pleghen
 vnde heft vns dessen deghen
 425 dorch vnsen vromen here ghesant
 ok so byn yk des ghemant
 dat he syn hermeschar
 hyr mot dryuen openbar
 vnder des de knape quam
 430 dar he de heydene vornam
 de hadden gheschapen ere hude
 deme crystene koninghe was to mode
 trütychlyken also yk vorsta
 den heydenen was to deme stryde gha
 435 wente er was vter matele (*sic*)¹⁾ wele
 jd ghynk dar al vtme spele
 Myd des de yunghelynk quam gherant
 vor de crystene alto hant
 vnde settede syk manlyk to der were
 440 myt swerde mit schylde vnde ok mit spere
 vnde sluch menneghen vromeden gha
 dat eme dat lyf vnde herte brast
 also wart mennech heydene gheslaghen
 to lesten se beghunden to yaghen
 445 myt scrychte vnde myt monnegher yucht
 de heydene nemen al dar de vlucht
 vnde hadden ghenomen groten schaden
 got suluen heft vns her gheladen
 (*Lücke; es fehlen zwei blätter.*)
 se sprak so segghet vns yuwen mot bl. 40^a
 450 me ghyft yw ros vnde wapene ghut

¹⁾ verschrieben für *maten*.

- he sprak rot pert vnde rot wapen
 de wurden eme to hant gheschapen
 aldus snel wart he bereyt
 manlyk up dat ros he screyt
 455 eme was na deme wolke ga
 aldus ret he hastlyken na
 vnder de heydensche kraft
 ghesammelt was myt sneller acht
 se hadden gheschykket ere schare
 460 myt des quam al dare
 ghereden myt vyl groter hast
 de wylleghaftyge ghist
 vnde wort de vorneste in der schar
 des nam de koningh ghuden war
 465 vnde dede deme heydenschen here
 myt syneme swerde grote were
 vnde myt manheyt schaden grot
 van eme mennych kos den dot
 aldus wart dar do der crystenheyt
 470 myt macht de seghe an gheleyt
 de heydene mosten wyken dan
 se verloren menneghen stolten man
 aldus behelt de ouerhant
 de crystenheyt vnde ok er lant
 475 De koningh sprak cryst weldyghe here
 du heft vns hûte mychyl ere
 ghegheuen vnde vroude grot
 wente dyn enghel vns ut not
 hat ghevoret vromelyk
 480 vnder des de knape thoghentryk
 rande raslyk van deme weghe
 vnde quam ut erē oghen pleghe
 vor de borch dat he reyt
 de portener ene in leyt
 485 he ylede van deme rosse nedder
 vnde schuddede syk ut deme wapene sodder
 vnde krop wyder myt der vart
 jn syne komeren vnghospart
 de dochter to der moder sprak
 490 do se den stummen kropel sach
 moder wy wyllen to eme ghan
 he wyl vns lychte weten lan
 wo de stryd ghescheyden ys
 wente yk byn des seker wys
 495 he ys der crystenne schermer wesen
 myn vader de ys wol ghenesen
 aldus se beyde quemen dar

b.

- se spreken vrunt segghe v̄ns war
 wo de stryd ys vorghangen
 500 dar na vns sere mot vorlanghen
 al stille swech de yunchere .
 des mogeden se syk harde sere
 de dochter dachte in erē mōt
 desse yunchere ghut
 505 hat dy got suluen here ghesant
 by eme bestan ys dyt lant
 ok weyt yk dat wol vor war
 he dryuet hyr syn hermeschar
 vnder des de koningh heyme quam
 510 myt syneme wolke also yk vornam
 vnde weren alle in vroer var
 de moder vnde de dochter vorwar
 de vntfenghen den koningh blydelyk
 do sprak de koninghynne ryk
 515 here wo ys de reyse ghan
 dot wol vnde latet yt my vorstan
 he sprak vrowe yk danke gode
 ik wyl stan to synen bode
 dat he vns myt syner hulpe trost
 520 van den heydenen hat gheloest
 dar quam eyn enghel de was rot
 de halp vns allen ut der not
 he was de vorneste in vnser schar
 wor eme vloghen se alle dar
 525 de heydene altomale
 he dede en monneghe quale
 dar na de enghel van vns reyt
 vnde wy weren alle des ghemeyt
 vnde numment wuste wor he quam
 530 do de vrowe dat vornam
 se dankede gode desser schycht
 vnde ghynk in den sal algherycht
 De dochter des ok nicht en leyt
 se dachte uppe des kropels arbeyt
 535 vnde ghynk dar se den kropel wuste
 se sprak em to sunder arghe lyste
 junchere nu dot my vorstan
 wat not dryft yw hyr an
 dat gy stum lygghen also eyn lam
 540 der rede he sere vnderquam
 he swech vnde dachte got my beware
 ower sprak de yuncvrowe clare
 junchere wetet den wyllen myn
 wo alle dyнк gheschapen syn

bl. 41 a

- 545 so moghe gy noch werden myn man
 des schole gy myne truwe han
 vnde yk wyl yw nummer mer vorkesen
 scholde yk dat lyf dar vmme vorlesen
 set nemet dyt ghuldene vyngheryn
 550 vnde beholdet yt vor den wyllen myn
 vppe truwe vnde to rechter ere
 he nam it vnde brak it intwey
 de ene helfte dede he er wedder
 de andere behelt he sodder b.
 555 do prouede an eme de maghet sart
 dat he was van ghuder art
 vnde de truwe an eme was
 vast also eyn addamas
 se nech om vnde ghynk van dan
 560 des wart vro de yunghe man
 Dar na de yar tyt eyn ende nam
 vp hof syk de elende vnde quam
 vnde krop vor de heren al
 in der borch vnde in den sal
 565 he nech en allen dar besunder
 dat duchte en wesen myhel wonder
 aldus krop en wech de yunghelynk
 de rechte vart he ane vynk
 to lesten dat he quam
 570 dar he den ensedelynk vornam
 he het ene wylle kome syn
 vnde sprakk leue sone myn
 stant up vnde sprek wedder myk
 doch hast du vorsumet dyk
 575 du heft ghesproken dre wort
 also yk wan gode hebbe ghehort
 des hestu ghebroken godes bot
 noch ys dyn reyse al eyn spot
 wultu godes bot bewaren
 580 so mostu noch enes varen
 al krupende to der borch wedder
 ok orloue yk dy sodder
 dre wort to sprekende in deme yare
 du most ok wol boden dare
 585 vnde slapen uppe wedderwant
 got hat dy de gnade sant
 des bodes scholtu breken nicht
 so werden alle dyne sake sclycht
 so mustu hyr krupende wedder komen bl. 42 a
 590 do dyt de knape hadde vornamen
 he sprak holdet my dyt gholt

- dat ghaf my de yuncvrowe stolt
 jk wyl lesten desse wart¹⁾
 vnde krupen to der borch wart
 595 aldus he ower quam
 dar he de borch vorham
 wol vntfenk ene dat ghesynde
 beyde man vrowen vnde kynde
 he krop in syn kemerlyn
 600 dar he to voren hadde syn
 dar kos he dat leggher ynne
 de yuncvrowe vnde de konynghynne
 sanden eme bedde (*v?*)²⁾ ghewant
 ok wart eme spyse ghesant
 605 mer wen he bedwynghen mochte
 wes he nicht bedrofte
 dat delede he myt den armen hyn
 aldus stunt syn pleghelyke syn
 Dar na de heydenysche soldan
 610 nam syk eynes tornes an
 wente dar vore gheslaghen was
 syn ghesynde also yk las
 des makede he sammelynghe grot
 syn ryke he to samēde bot
 615 vnde toch an des konynghes lant
 do quam eyn bode dar gherant
 de brachte nuwe mere
 wo de soldan ghekomen were
 vnde wolde dat lant vorderuen
 620 den koningh ghar vnterwen
 de koningh in der suluen vart
 myt syner mach berede wart
 vnde randen hastlyken sere
 alle to der lantwere
 625 to hus blef nūmmēnt mere
 also des anderen jares ere.
 do ower de kropel uppe de mūre
 krop al wart yt em sure
 vnde sach deme wolk allent na
 630 der koninghynnen der was gha
 ere se myt der dochter quam
 dar se den kropel vornam
 se sprak yunchere wylle gy mede
 he sprak ya up der suluen stede
 635 se spreken segghet vns yvuen mot
 men ghyft yw ros vnde wapene ghut

b.

¹⁾ aus *wort* gebessert.

²⁾ soll wol heissen: *bedde vnde gewant*.

- he sprak wyt pert vnde wyt wapen
 dat wart eme to hant gheschapen
 he sprank up vnde reyten en wech
 640 vnde vruchtete brughen edder stech
 em was myt hastycheyt gha
 vnde quam in korter wyle da
 vnde was de erste de strydes beghunde
 vnde brak syk an der suluen stunde
 645 dor de vyende dwers vnde lank
 dat swert an synen henden klank
 also dat mennech kos den dot
 vnde brachte de heydene in grote not
 he hvü vnde stak so menneghen steke
 650 van eme so nemen se alle den weke
 got heft eme de macht gh sant (*sic*)
 do quam de soldan dar gherant
 myt eyner schar gruwelyk
 jeghen eme toch de deghen ryk
 655 he wart an syk so ghar vorbolghen
 de crystenheyt beghunde volghen
 dar wart der heydenen wyl gheslaghen
 dat wylle wy nicht sere beklaghen
 vnder des de yunghelynk bl. 43 a
 660 den groten soldan he do wynk
 vnde warp ene vor syk up syn ros
 he enschuwede grauen edder mos
 vnde ret myt eme to walde
 de yunghelynk vyl balde
 665 dede af synen helm ghut
 ok quam eme dat an synen mot
 dat he deme soldane ok af dede
 synen helm an der suluen stede
 do vnder segghen se syk beyde
 670 de yunghelynk al sunder leyde
 wedder up bant synen hellem
 vnde ret dor buch (*sic*)¹⁾ vnde dor mellem
 so langhe dat he den koningh vant
 den soldan gaf he eme in de hant
 675 vnde kerde syk raslyk wedder vmme
 vnde ret recht vnde nicht de krumme
 wente he ut eren oghen quam
 aldar he de borch vornam
 dar wart he ghelaten yn
 680 he dede syk ut den wapen syn
 vnde krop wedder in syn ghemak

¹⁾ vgl. busch 354.

- dar he syner rowe plach
 de koningh quam do heyme reden
 syn vnghemak was wol gheleden
 685 se weren vter maten vro
 de eddele konynghe de sprak do
 got hat wol by vns ghedan
 dat wet yk werlyk sunder wan
 syn enghel de was ower dar
 690 des nam yk suluen ghuden war
 he was wyt also eyn sne
 vnde dede den vyenden dykke we
 vnde brachte my suluen den soldan
 ghe vanghen den yk hyr noch han
 695 nu wyl he nicht ghedynghe
 ere wy eme den vore brynghe
 de ene wynk myt syner hant
 werlyk he ys vns vnbekant
 wente he vorhalen reyde
 700 jk swere yt was eyn enghel ghemeyt
 aldus wart de soldan
 an eynen thorn ghedan
 Dar na de yartyt eyn ende nam
 do sulues de kropel quam
 705 vnde nech deme wolke allen sam
 der yuncwrowen ersten by namen
 wente se hadde eme dan mennech ghut
 van dennen korde he synen mot
 vnde krop na syner wonheyt
 710 doch quam de yunchere meyt
 aldar he den ensedelynk vornam
 aldus krupende he vor eme quam
 he heyt ene wylle kome syn
 vnde sprak leue sone myn
 715 stant up vnde sprek in vroer var
 vul endet ys dyn hermeschar
 du scholt yummer seker wesen
 jk wyl eyne mysse lesen
 dar to scholtu myn helper (o?) syn
 720 he sprak gherne here vader myn
 ower de ensedelynk to eme sprak
 noch mostu weynech vnghemak
 wort lyden so blyfstu godes vort
 de waraftyche vor dyner bort
 725 ssproken vnde ghekundeghet wart
 du most styghe eyne vart
 myt lyue vnde myt sele to der helle
 doch blyuet ghut dyn ghewelle

b.

- wenne yk up heue vnsen heren
 730 myt werdycheyt in groten eren
 so kumpt dar eyn mychel schar
 der duuele vnde nemen dy openbar
 vnde voren dy an de helle grunt
 myt lyue vnde myt sele dat sy dy ghekunt
 735 dar en blyfstu lengher nicht
 wen dyt stylnysse ys berycht
 so brynghen se dy wedder hir
 to der mysse helpesstu wort myr
 so machstu ane twyuel wesen
 740 dat du wol byst ghenesen
 De ensedelynk hof an de myssen
 he halp em wente tome stylnysen
 do he to deme stylnisse was ghekomen
 do hadde de yunghelynk vornomen
 745 der thouer eyn wyl grot dat her
 vnde nemen ene al sunder wer
 vnde vorden ene an de helle grunt
 de pyne dvchte eme langhe stunt
 do dat stylnysse was ghedan
 750 do was de sulue yunghe man
 wedder in dat munster ghesat
 de ene vorde de onwas nich lat
 vnde halp deme ensedelynghe vort
 to der myssen also yk hebben hort
 755 he was also eyn dñue grau
 gheworden de mysse dar nar
 quam to ende eme wart ghegheuen
 de segenynghe dar he stunt beneuen
 do he godes denst hadde hort
 760 de yunghelynk¹⁾ sprak dus dane wort
 here gy seden my van eyner stunden
 de scholde yk wesen in der helle grunde
 vnde ok lengher nycht
 so syt seker des berycht
 765 dat yk wol dre durent yar
 an pynen hebbe wesen dar
 De ensedelynk de sprak to hant
 leue sone nu sy ghenant²⁾
 jo vumdestu my ouer deme altaro
 770 dar du my stande letest ghare
 men wes nu seker vor alle not
 vnde hebbe blydeschop grot

bl. 44^a

b.

¹⁾ steht am Rande für ausgestrichen: ensedelynk.

²⁾ Verschrieben für: ghemant.

- se nedder vnde nym rechte war
 do sach he syten openbar
 775 in der helle beyde ghader
 syne moder vnde synen vader
 jn groter pyne enghestlyk
 ok sach de sulue¹⁾ ryk
 dar leddech stan eynen stuel
 780 he was rot also eyn glogendych kol
 do sprak de ensedelynk to ym
 de scholde hebben wesen dyn
 nv se wedder upwort
 dar na so blyf vnverwert
 785 he sach up gar vrolyk
 do sach he in dat hemmelryk
 dar seten vader vnde moder beyde
 jn groter vroude sunder leyde
 dar by twe stole de leddych weren
 790 ghesyret wol myt groten eren
 do sprak de yunghelynk to hant
 here nu dot my bekant
 wo yk dyt schal vorstan
 van vrouden des grawen wart he an
 795 de ensedelynk ower sprak
 du heft vorwunnen dyn vnghemak
 du heft ghelaset beyde ghader
 dyne moder vnde dynen vader
 se blyuet ewych sunder leyde
 800 worummer de anderen stole beyde
 de du seghest ryklyk stan
 der scholtu suluen eynen han
 den anderen de yuncvrowe dyn
 de dy ghaf ere vyngherlyn
 805 dar scholtu wedder varen
 du mocht nicht lengher sparen
 vnde scholt se to wyue han
 vnde da vor den heydenen stan
 dat lant schaltu vorheghen
 810 dar to schaltu houescher tuchte pleghen
 vnde wesen er van herten holt
 se hyr ys dyn eghene gholt
 dat yk hade in myner hude
 nu wes wys vnde vrude
 815 Nv scholtu heuen wanderen dÿn rochten pat
 by der borch dar licht eyne stat
 dar te hen vnde kop dy schyro

bl. 45 a

¹⁾ fehlt ein Wort wie: knape.

- ghuder perde were
 vnde se vmme twe knapen
 820 de dy to denste synt gheschapen
 lat leddych ghan en port dat beste
 vnde te denne to der weste
 vnde bet denne dynen denst dar
 de yunghelynk de sprak openbar
 825 here dyt schal yk gherne don
 got suluen mote syn yuwe lon
 so wyl yk yuwen orlof han
 hyr nicht lenk vnde scheydede van dan
 em was nicht to der reyse lat
 830 wente he quam in de suluen stat
 he kofte kledere vnde perde
 em worden ok twe knapen werde
 Nycht lengher wolde he dat vormyden
 he beghunde to der borch ryden
 835 dar wart he vntfanghen wol
 men dede eme also men vrunden sol
 he bot deme koninghe ryk
 synen denst wyllychlyk
 he vntfenk den yunghen degghen
 840 vnde let syner myt tuchten pleghen
 nochten kande ene nen man dar
 men de yuncvrowe wart syner war
 vnde sprak wylleue moter myn
 kenne gy gycht den knapen fyn
 845 se sprak nen yk nicht wol
 eya moder yk yw saghen sol
 jd ys de sulue stumme
 de hyr krop in der krumme
 se sprach dochter du secht war
 850 jk kenne ene an synen oghen klar
 dochter wy wyllen beyde ghan
 vor dynen vader den koningh stan
 vnde bydden ene dat he vns wylle twyden
 dat he ut late to dessen tyden
 855 den soldan de hyr ghewanghen ys
 so syn wy seker vnde wys
 dat he ene kent an synē anghesychte
 so vorware wy dat rechte
 vnde moghen denne der warheyt ghen
 860 wo de dyngh syn gheschen
 de dochter sprak dat scal syn
 jk bydde wol den vader myn
 Aldus wart de bede ghedan
 des moste ut deme thorne ghan

b.

- 865 de soldan in der suluen wart
 de taffele do ghe maket wart
 dar wart ok do sunder hat
 de soldan alder owerst ghesat
 eme neghest de koningh by
- 870 dar neghest de konynghynne vry
 der yuncvrowen vnde deme knapen
 dat etent to samende wart gheschapen
 doch dykke sach de soldan
 den suluen vromeden knapen an
- 875 he dachte dyt ys de deghe¹⁾
 de my vynk myt synen slegghen
 vnde sprak lude koningh here
 mot yk yw saghen nūwe mere
 jk se den suluen man
- 880 de my den schaden hat ghedan
 de my vynk myt syner hant
 dar syt he vnde ys my wol bekant
 De koningh sprak wo mochte dat wesen
 he ys hyr ne er ghewesen
- 885 de dochter to deme vadere sprak
 vorghanghen ys myn vnghemak
 desse here de secht war
 desse yunchere openbar
 js de sulue man
- 890 twar dat wetet vader sunder wan
 jk ghaf eme de truwe myn
 des mach wol mer wen eyn yar syn
 do seden se algherycht
 wo gheschopen was de schycht
- 895 hyr mede se ene vmmevynk
 do de vader sach de dynk
 he sprak nū dyt ys ghedan
 so schole gy myne dochter han
 tho wyue vnde to rechter ee
- 900 dat yw dar mede lucke schee
 aldus wart eme myt presters bant
 de yuncvrowe gheuen in de hant
 vnde wart eme to bedde bracht
 ja groten eren wol bedacht
- 905 Dar na in deme lande
 droch he de krone sunder schande
 he makede myt deme soldane
 eynen wrede by mynen wane
 he worheghede dat lant myt eren

bl. 46 a

b.

¹⁾ Der n-Strich fehlt.

- 910 also wol temet eyneme heren
 wente an de tyt dat he starf
 dar mede he godes hulde worwarf
 syn wrowe ok des nicht en leyt
 se denede gode myt stedycheyt
 915 Aldus so leueden se selychlyk
 vnde voren in godes hemmelryk
 also mote my allen samen
 jn ghodes nomen A M E N

 de dyt bok ghedychtet vnde ghescreuen hat
 920 got gheue syner sele rat
 dat hemmelryke to lone
 de vorlorne sone
 schal dyt bok ghenømet syn
 dat neme yk uppe de truwe myn
 925 dat he was verloren
 er he wart gheboren
 beyde myt sele vnde myt lyue
 doch ghaf got eme der salden schyue
 dat he vorvan alle syne not
 930 vnde heft myt gode vroude grot
 des behelpe vns allen samen
 jn goden momen (*sic*) A M E N

 dyt bok dat ys vte (*rot*)
 me hale vns ghut ber up de snüte
 935 wuste yk eynen ysren hot (*rot*)
 de vor loghene were ghöt
 vnde eynen schylt vor schelden
 938 den wolde yk dure ghelden.
-

De segheler (Fragment.)

hyr gheyt an de segheler¹⁾

It was eyn schypher ryke vnde here bl. 96^a
vnde hadde eyn bedderue wyf na syner ghere

de was schone wys vnde klar

he hadde se hat monnych yar

5 deme seghelere quam yt also

he wolde seghelen des wart ze vnwro

se sprak myn vylleue man

we schal my nu dat hus vorstan

he sprak dat schal dūn sekerlyk

10 myn truwe knape hynryk

he sprak hynryk om²⁾ vylleue knecht

se wol to also du wol hast recht

wente dy schal bevolen syn

de herte leue vrouwe myn

15 jk bewele se dy al openbar

nym erer truwelyken war

aldus nam he se an syne hude

de vrouwen schone vnde vrode

wan danne vur de segeler

20 vmme kopenschop owermer

de vrouwe ghaf em eren seghen

se sprak got myte dyner pleghen

dat du drade motest wedder kopen³⁾

sunt myt eren vnde myt vromen

25 dar na ghynk de vrouwe fyn

to der myssen an eyn klosterlyn

dar ynne weren preddekere

des hadde de pryer an ere

gheleghen alle synen syn

30 se duchte em schone vnde fyn

he mochte lengher nycht vormyden

vnde sprak to er an eynen tyden

dochter myn gha her to my

jk wyl spreken wedder dy

35 se ghynghen sytten an eyne bycht

he sprak dochter wes des berycht

b.

¹⁾ in roter Schrift am Ende des Blattes 95^b.

²⁾ vgl. Wbch. III. 227^b.

³⁾ verschrieben für: komen.

- dat yk byn van dy ghewunt
wul sere an mynes herten grunt
wultu myn trosterynne wesen
40 sprek ya so byn yk ghenesen
se sprak here dat were sunde
dat yk my myt yw bevrunde
vnde mynen manne vntruwe dede
des moste yk valten myt grotē bede
45 he sprak des schaltu vruchten nycht
jt ys nene sunde des sy berycht
jk wet dat wol du bedrofst des gholdes
dar vmme yk dy gheuen sol
theyn mark sūluers gheueghen wol
50 des wylle wy beyde vroude pleghen
dat suluer wyl yk dy wol gheweghen
ze sprak yk wyl hyr denken to
jk kome hyr wedder morghene vrū
vnde saghe yk den wyllen myn
55 van danne ghynk de vrouwe fyn
se dachte dat se nycht wolde mere
mysse horen to den preddekeren
des anderen daghes se mysse horde
jn deme klostere des grawen orden
60 de vrouwen sach de ghardyan
he beghūde ut deme kure ghan
vnde ghynk to der vrouwen stolt
he wart er van herten holt
he sprak dochter gha myt my
65 jk wyl spreken wedder dy
do se quemen in den cruceghank
vyl sere eme de mynne duank
he sprak dochter yk wyl dy gheuen
twyntych mark¹⁾ suluers wol gheweghen
70 wultu don den wyllen myn
sprek ya leue vrouwe fyn
berychte my in desser stunt
myn herte ys sere van dy ghewunt
se sprak leue here myn
75 jk wyl kort hyr wedder syn
vnde wyl yw saghen wedde dan
ofte yk ywen wyllen vorwullen kan
de vrouwe ghynk van dannen do
heym vnde wart de meren vnwro
80 se dachte wat wyten de monnyke dy
vnde sprak wat so wyllen se leren my

bl. 97 a

¹⁾ mrk mit kleinem übergeschriebenem a = mrk.^a

- du schalt mer in de parren ghan
vnde laten de monnyke in ereme klostere stan
vnde horen dar de myssen lesen
- 85 se dachte myt ghemake wesen
aldus plach se sunder wan
to der parren to der myssen ghan
to eynen tyden dat gheschach
de vrouwe am ereme bede lach
- 90 se bat gode vor eren man
de kerkhere bouen se ghynk stan
he sprak vrouwe gy moten breken
yuwe bet yk mot yw spreken
do stunt up de vrouwe fyn
- 95 se sprak wat bede gy here myn
he druckede de vrouwe an ere hant
vnde sprak vrouwe nu syt des ghenant
myn herte hat jw vtherkoren
sprekestu nen yk werde verloren
- 100 troste my dorch de ghute dyn
vnde dot vrouwe den wyllen myn
mynes herten trut des syt berycht
yk en byddes yw vorgheues nycht
so wyl yk yw gheuen al gherychte
- 105 druchtych mark suluers an ghuder wychte
do sprak de schone vrouwe ghemeyt
here juwe vnghemak dat ys my leyt
jo doch en dor yk des nycht bestan
men gy scholen weten sunder wan
- 110 jk kome morphene gherne wedder
vnde saghe yw mynen wyllen sodder
do sprak de perner also do
kum jo wedder morne vro
aldus ghynk heym de vrouwe fyn
- 115 se sprak jhesus vyl leue here myn
beware myne ere vulentlyk
do quam ere knape hynryk
he sprak vil leue vrouwe myn
wor vmme trovych yuwe syn
- 120 hebbe gy brake ychtes gycht
se sprak hynryk nen yk nycht
mer woldestu yd vor ghut vntfan . . .
.

b.

(Schluss fehlt.)

In unserm Verlage ist ferner erschienen:

Niederdeutsche Denkmäler.

Band I.

Das Seebuch

von

Karl Koppmann.

Mit einer nautischen Einleitung

von

Arthur Breusing.

Mit Glossar

von

Christoph Walther.

Preis: 4 Mark.

Niederdeutsche Denkmäler.

Band II.

Gerhard von Minden.

Von

W. Seelmann.

Preis: 6 Mark.

Jahrbuch

des Vereins für niederdeutsche Sprachforschung.

Jahrgang 1875. Preis: 3 Mark.

„ **1876.** „ 4 „

„ **1877.** „ 4 „

„ **1878.** „ 4 „

Korrespondenzblatt des Vereins für niederdeutsche Sprachforschung.

1. Jahrgang. (Mai 1876—Mai 1877.) Preis: 2 Mark.

2. Jahrgang. (1877.) Preis: 2 Mark.

3. „ (1878.) „ 2 „

4. „ (1879.) „ 2 „

Bremen.

J. Kührtmann's Buchhandlung.

Interlibrary
Loan

